

MESYUARAT KEDUA, PENGGAL KETIGA  
PARLIMEN KEEMPAT BELAS  
2020

**HARI SELASA : 4 OGOS 2020**

**JAWAPAN-JAWAPAN BAGI PERTANYAAN-PERTANYAAN JAWAB**  
**LISAN YANG TIDAK DIJAWAB DI DALAM DEWAN**  
**( SOALAN NO. 11 HINGGA NO. 52 )**

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DATUK HAJAH AZIZAH BINTI DATUK SERI  
PANGLIMA HAJI MOHD DUN [BEAUFORT]**

**TARIKH : 4 OGOS 2020 (SELASA)**

**SOALAN**

**DATUK HAJAH AZIZAH BINTI DATUK SERI PANGLIMA HAJI MOHD DUN [BEAUFORT] minta MENTERI KESIHATAN menyatakan:**

- (a) apakah kunci utama kejayaan Kementerian dalam menangani isu wabak COVID-19 yang semakin berkurangan sehingga Malaysia dijadikan contoh terbaik di seluruh dunia; dan
- (b) apakah usaha-usaha yang dijalankan oleh Kementerian dalam menemui vaksin untuk merawat pesakit wabak COVID-19.

**JAWAPAN**

**Tuan Yang di-Pertua,**

1. Berdasarkan dapatan yang diperolehi oleh para penyelidik dari seluruh dunia, begitu juga dengan tren kes yang dilaporkan, kejadian pandemik COVID-19 ini dijangka akan berterusan untuk suatu tempoh masa yang agak lama. Malaysia telah menghadapi **gelombang pertama bermula dari 2 Januari 2020 sehingga 15 Februari 2020. Kini Malaysia di gelombang kedua sejak kes pertama dilaporkan pada 27 Februari 2020.**

2. Menyedari hakikat ini, Kementerian Kesihatan Malaysia (KKM) telah **melaksanakan langkah bersifat tuntas** dalam **mengekang penularan**

jangkitan COVID-19 di kalangan masyarakat setempat dan ternyata ia memberikan hasil yang menggalakkan. Antara langkah-langkah yang telah diambil ialah:

2.1 **Memperkukuhkan dan meningkatkan kesiapsiagaan;**

Dalam menangani wabak ini antaranya dengan **meningkatkan kapasiti fasiliti kesihatan** dan **peralatan perubatan** untuk merawat pesakit, memastikan **bekalan ubat** sentiasa **mencukupi**, **kesediaan makmal** pada suatu tahap yang **optimum** bagi melaksanakan ujian pengesanan COVID-19 serta **penubuhan pusat kuarantin** dan rawatan berisiko rendah.

2.2 **Whole-Of-Government Approaches;**

**Penglibatan pelbagai jentera Kerajaan** yang diterajui oleh Majlis Keselamatan Negara (MKN) selaku Sekretariat Kebangsaan COVID-19, bagi memastikan **semua aktiviti kawalan** dan **pencegahan dapat dijalankan** secara **komprehensif** dan **berkesan hingga ke peringkat akar umbi**. Ianya dikenali sebagai *whole-of-government approaches*.

2.3 **Whole-Of-Society Approaches;**

**Memperkasakan kerjasama di setiap peringkat dan lapisan masyarakat** dalam memainkan peranan masing-masing, yang meliputi amalan kelaziman baharu dalam kehidupan seharian serta pematuhan kepada Prosedur Operasi Standard (SOP) seperti yang telah ditetapkan oleh Kerajaan. Ini dapat dilihat daripada komitmen rakyat Malaysia yang bekerjasama untuk menyediakan, menyumbang dan meningkatkan bekalan *Personal Protective Equipment* (PPE) pada peringkat awal memerangi pandemik, di mana terdapat kekurangan PPE di peringkat global termasuklah Malaysia. Ini merupakan *whole-of-society approaches* yang amat membanggakan.

2.4 **Pengurusan Kes dan Kluster Yang Efektif;**

**Pengurusan** kejadian kluster jangkitan COVID-19 secara **berkesan dan menyeluruh** melalui **pengesanan kes secara aktif** (*active case detection*) dalam kalangan kontak rapat yang dijejaki. Kluster yang berjaya dibendung dengan pantas melalui pendekatan tersebut akan dapat mengelakkan penularan jangkitan dari berlaku secara meluas dalam kalangan masyarakat setempat. Pengesanan kes secara aktif ini turut melibatkan aktiviti saringan bertumpu yang terdiri dari sembilan (9) kumpulan sasar sebagaimana berikut:

- a) Para peserta tabligh yang menyertai perhimpunan di Masjid Seri Petaling, Kuala Lumpur;
- b) Para pelajar tahfiz / madrasah di seluruh negara disebabkan rantai epidemiologi yang dikesan dalam kalangan mereka dengan peserta tabligh yang menyertai perhimpunan di Masjid Seri Petaling, Kuala Lumpur;
- c) Petugas perubatan dan kesihatan KKM;
- d) Penduduk di lokaliti yang diletakkan di bawah semua jenis Perintah Kawalan Pergerakan Diperketatkan (PKPD);
- e) Pengembara yang tiba dari luar negara;
- f) Peniaga pasar yang dikenalpasti mempunyai kaitan dengan kluster positif yang dikesan di Pasar Borong Kuala Lumpur;
- g) Pekerja bukan warganegara bagi sektor pembinaan dan keselamatan di sekitar Lembah Klang;
- h) Penghuni dan pekerja di Pusat Jagaan Warga Emas;
- i) Tahanan dan anggota yang bertugas di Depoh Tahanan Imigresen.

2.5 **Perintah Kawalan Pergerakan (PKP);** dan  
**PKP** yang mula dikuatkuasakan **sejak 18 Mac 2020** dan dilanjutkan sebagai **PKP 1, 2, 3, 4** dan seterusnya **Perintah Kawalan Pergerakan Bersyarat** (PKPB) serta **Perintah Kawalan Pergerakan Pemulihan** (PKPP) telah membantu memberi ruang bagi pihak Kerajaan dalam pelaksanaan pelbagai aktiviti dan tindakan Kesihatan Awam untuk membendung penularan jangkitan COVID-19 secara berkesan. Selain dari **pengawalan rapi Pintu Keluar Masuk Antarabangsa Negara**, PKP secara berfasa turut menyaksikan **kawalan pergerakan antara negeri di Malaysia** dan **kawalan terhadap penganjuran aktiviti berkumpulan**. Tindakan drastik ini telah menyebabkan **penurunan kepada kes aktif COVID-19** yang direkodkan secara maksima, yang seterusnya berhasil dalam **melandaikan lengkung** (*flattened the curve*).

2.6 **Protokol Rawatan.**  
 Sejak kemunculan pandemik COVID-19, Kementerian Kesihatan telah **membangunkan protokol rawatan COVID-19** yang dikemaskini berdasarkan saranan badan antarabangsa seperti Pertubuhan Kesihatan Sedunia (World Health Organization - WHO), kajian saintifik dan keberkesanan rawatan ke atas pesakit-pesakit di Malaysia dan di luar negara. Sehingga kini tiada ubat khusus bagi merawat COVID-19. Protokol rawatan terkini **berpandukan tahap klinikal COVID-19, status klinikal pesakit**, keputusan ujian makmal dan radiologi serta pelan rawatan pesakit. Berdasarkan data COVID-19 di Malaysia, pada 23 Julai 2020, kadar kes pulih dan discaj dari wad adalah sebanyak 97%, lebih tinggi berbanding kadar sembuh global iaitu 56.7%.

**Tuan Yang di-Pertua,**

3. Antara usaha-usaha yang dijalankan oleh Kementerian Kesihatan dalam menemui vaksin untuk merawat pesakit wabak COVID-19 adalah seperti berikut:

3.1 Institut Penyelidikan Perubatan (IMR) dengan kerjasama Universiti Putra Malaysia (UPM) dan Ipharm sedang **menjalankan penyelidikan pembangunan vaksin nyah aktif** (*inactivated*). Salah satu keperluan iniatif ini adalah mempunyai virus COVID-19 yang telah berjaya dihidupkan oleh Institut Penyelidikan Perubatan. Langkah-langkah seterusnya adalah:

- a) Mengenalpasti strain virus SARS-CoV-2 yang sesuai digunakan untuk membangun vaksin;
- b) Pengoptimumkan kaedah nyah aktif virus dengan menggunakan virus "*Avian Coronavirus Infectious Bronchitis Virus* (IBV)"; dan
- c) Mengenalpasti fasiliti sesuai untuk menjalankan pengujian ke atas haiwan.

4. Institut Penyelidikan Perubatan berharap penyelidikan ini akan menjadi titik permulaan pembangunan vaksin COVID-19 di Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN FONG KUI LUN [ BUKIT BINTANG ]**

**TARIKH : 4 OGOS 2020 (SELASA)**

**SOALAN**

**TUAN FONG KUI LUN [ BUKIT BINTANG ]** minta **MENTERI WILAYAH PERSEKUTUAN** menyatakan cadangan menjadikan kawasan China Town Pusat Bandaraya Kuala Lumpur sebagai kota warisan dan terpelihara dari kemasukan warga asing baik untuk kediaman dan perniagaan mereka.



**JAWAPAN**

Tuan Yang Di Pertua,

Untuk makluman Yang Berhormat Bukit Bintang, Pelan Bandar Raya Kuala Lumpur 2020 (PBRKL 2020), telah menetapkan kawasan sekitar Jalan Petaling, Jalan Tun Tan Cheng Lock, dan Jalan Tun HS Lee sebagai Kawasan Warisan Sekunder (*Secondary Heritage Area*) yang merangkumi bangunan kedai lama dan bersejarah. Kawasan ini perlu mengekalkan karekter kawasan rumah kedai dalam bentuk pemeliharaan fakad, reka bentuk dan persekitaraan dengan kawalan pembangunan berdasarkan garis panduan Dewan Bandaraya Kuala Lumpur (DBKL).

Seterusnya, kawalan berhubung penglibatan warga asing baik untuk kediaman dan premis perniagaan adalah tertakluk kepada garis panduan “Permohonan Lesen Premis Perniagaan oleh Pemohon atau Syarikat Warganegara Asing” dan bagi tapak- tapak gerai, pengoperasion oleh warga asing adalah tidak dibenarkan. Tindakan penguatkuasaan secara berterusan juga akan dilaksanakan selaras dengan hasrat memastikan pematuhan terhadap garipanduan yang disediakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' MOHD NIZAR BIN HAJI ZAKARIA  
[PARIT]**

**TARIKH : 4 OGOS 2020 (SELASA)**

**SOALAN**

**YB DATO' MOHD NIZAR BIN HAJI ZAKARIA (PARIT) minta PERDANA  
MENTERI menyatakan:**

- a) apakah komitmen Kerajaan terhadap penggubalan Rang Undang-undang Pembiayaan Dana Politik untuk mengawal selia sumbangan politik bagi mengelakkan berlakunya rasuah; dan
- b) apakah maklum balas serta cadangan yang telah diterima oleh Kerajaan berkenaan penggubalan rang undang-undang ini.

**JAWAPAN : YB DATO' TAKIYUDDIN BIN HASSAN,  
MENTERI DI JABATAN PERDANA MENTERI (PARLIMEN DAN  
UNDANG-UNDANG)**

Tuan Yang di-Pertua,

1. Dasar sumbangan politik dalam format rang undang-undang telah dikemukakan kepada Jawatankuasa Pilihan Khas Menimbang Rang Undang-Undang Parlimen (PSC) pada 7 November 2019.
2. Setakat ini maklum balas yang diterima adalah daripada sesi libat urus bersama beberapa parti politik dan sesi taklimat bersama mantan YAB Perdana Menteri Ke-7 pada 8 April 2019. Kerajaan berpendapat bahawa terdapat ruang untuk penambahbaikan dibuat kepada dasar tersebut.
3. Bagi tujuan penambahbaikan tersebut, Kerajaan telahpun mengarahkan Pusat Governans, Integriti dan Anti-Rasuah Nasional (GIACC) untuk membantu Jawatankuasa Pilihan Khas Menimbang Rang Undang-Undang Parlimen mengadakan kajian lanjut dan sesi *townhall* dengan semua pemegang taruh dan mengemukakan laporan penambahbaikan dasar tersebut kepada Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI SHAMSUL ISKANDAR @ YUSRE BIN  
MOHD AKIN [ HANG TUAH JAYA ]**

**TARIKH : 4 OGOS 2020 (SELASA)**

**SOALAN**

**DATUK SERI SHAMSUL ISKANDAR @ YUSRE BIN MOHD AKIN [ HANG  
TUAH JAYA ]** minta **MENTERI PERUSAHAAN PERLADANGAN DAN  
KOMODITI** menyatakan di dalam ikhtiar untuk membantu pekebun-pekebun  
kecil komoditi, adakah Kementerian berhasrat untuk melaksanakan subsidi  
berasaskan 'output' iaitu ganjaran mengikut prestasi berbanding subsidi 'input'.

**JAWAPAN**

Tuan Yang Di-Pertua,

Berdasarkan keperluan masa kini, pekebun-pekebun kecil sektor  
agrikomoditi negara masih berlandaskan bantuan dan subsidi berbentuk input.  
Oleh yang demikian, Kementerian lebih memberikan fokus kepada  
pelaksanaan subsidi berdasarkan input. Pemberian bantuan dalam bentuk input  
akan memastikan pengeluaran yang tinggi. Antara bantuan dan subsidi  
berbentuk input yang diberikan oleh pihak Kementerian adalah seperti berikut:

- (i) Skim Pinjaman Mudah Tanam Semula Pekebun Kecil Sawit (TSPKS);
- (ii) Skim Pinjaman Mudah Input Pertanian Pekebun Kecil Sawit (IPPKS);

- (iii) Skim Insentif Integrasi Tanaman dengan Sawit (ITA);
- (iv) Skim Insentif Integrasi Ternakan dengan Sawit (ITE);
- (v) Bantuan Insentif Input Pertanian koko;
- (vi) Bantuan Input Pertanian Pakej Rangsangan Ekonomi Prihatin Rakyat (PRE PRIHATIN 2020);
- (vii) Skim Tanaman Baharu Lada; dan
- (viii) Insentif Tanaman Kenaf bagi pengeluaran benih dan biomass.

Walau bagaimanapun, Kementerian menyedari pendekatan ini perlu dikaji semula untuk meningkatkan motivasi dan hasil pengeluaran pekebun kecil agrikomoditi. Oleh yang demikian, pihak Kementerian juga telah mula melaksanakan pemberian subsidi berdasarkan hasil pengeluaran atau output. Kementerian sentiasa mengkaji insentif-insentif seperti ini untuk ditambah baik dari semasa ke semasa. Dalam hal ini, antara insentif berasaskan hasil pengeluaran atau output yang telah dilaksanakan oleh pihak Kementerian adalah Insentif Pengeluaran Getah (IPG) dan insentif belian balik batang kenaf dan benih kenaf.

Untuk makluman Ahli Yang Berhormat, IPG adalah insentif berbentuk wang tunai yang diberikan kepada setiap pekebun kecil getah berdasarkan jumlah pengeluaran bulanan. Paras Harga Pengaktifan (PHP) IPG adalah RM2.50/kg *cuplump* di peringkat ladang. IPG ini akan dituntut pada bulan berikutnya mulai 1hb sehingga akhir bulan dan hanya akan dibayar kepada pekebun kecil getah yang memiliki Permit Autoriti Transaksi Getah (PAT-G). Secara keseluruhannya, bermula dari 1 September 2015 sehingga 31 Mei 2020, Kerajaan telah membuat pembayaran sebanyak RM317.88 juta bagi 499 ribu tan metrik getah merangkumi hampir 2.23 juta tuntutan di Semenanjung, Sabah dan Sarawak.

Selain itu, pihak Kementerian melalui Lembaga Kenaf dan Tembakau Negara (LKTN) telah menyediakan insentif belian balik batang kenaf dan benih masing-masing pada kadar RM500/tan dan RM15/kilogram (kg) kepada penanam kenaf. Insentif ini akan ditambah baik dengan pelaksanaan kadar baharu belian batang kenaf kering kepada RM730/tan berbanding RM500/tan iaitu peningkatan sebanyak RM230/tan. Manakala kadar baharu pengeluaran benih pula akan ditingkatkan kepada RM25/kg berbanding RM15/kg iaitu peningkatan sebanyak RM10/kg. Pelaksanaan inisiatif ini akan menjadi pendorong kepada penanam kenaf untuk meningkatkan pengeluaran tanaman dan seterusnya menjana pendapatan yang lebih tinggi.

Tuan Yang di-Pertua,

Kementerian juga telah merancang dan memohon peruntukan dalam Rancangan Malaysia Kedua Belas (RMKe-12) untuk memperkenalkan Program Rangsangan Pengeluaran Hasil Koko. Insentif ini adalah salah satu strategi untuk menggalakkan pengusaha koko meningkatkan pengurusan kebun yang baik yang seterusnya meningkatkan pengeluaran dan produktiviti hasil ladang. Semakin banyak pengeluaran, semakin tinggi nilai tambahan insentif yang akan diterima oleh pekebun kecil koko. Insentif sebegini dilihat lebih produktif dan efektif dalam memastikan peruntukan Kerajaan yang disalurkan dapat diterima oleh golongan sasaran sebenar di samping dapat meningkatkan pengeluaran koko negara.

Kementerian juga sedang dalam usaha merancang dan mengkaji kesesuaian insentif berasaskan output ini untuk komoditi lain. Usaha dan ikhtiar dalam memastikan kebajikan pekebun kecil agrikomoditi serta menstabilkan harga agrikomoditi sentiasa menjadi keutamaan Kementerian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ROZMAN BIN ISLI [ LABUAN ]**

**TARIKH : 4 OGOS 2020 (SELASA)**

**SOALAN**

Minta **PERDANA MENTERI** menyatakan bilakah Surau Nurul Islam di Bandar Labuan akan dinaik taraf dan dibesarkan kapasitinya memandangkan ia selalu penuh dan sesak terutamanya pada hari Jumaat dan selalu digunakan oleh penumpang-penumpang dari Terminal Feri dan bot antarabangsa Labuan.

**JAWAPAN**

**YB SENATOR DATUK DR. ZULKIFLI MOHAMAD AL-BAKRI MENTERI  
DI JABATAN PERDANA MENTERI (HAL EHWAL AGAMA)**

Tuan Yang Dipertua,

Untuk makluman Ahli Yang Berhormat,

(i) Jabatan Agama Islam Wilayah Persekutuan (JAWI) telah meneliti keperluan pembesaran Surau Nurul Islam di Labuan dan mendapati bahawa masalah kesesakan jemaah dapat ditampung pada masa ini.

(ii) Walau bagaimanapun untuk mengatasi masalah tersebut dalam jangka masa panjang, JAWI akan mempertimbangkan untuk melaksanakan kerja-kerja pembesaran Surau Nurul Islam pada tahun hadapan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN ALICE LAU KIONG YIENG [ LANANG ]**

**TARIKH : 4 OGOS 2020 (SELASA)**

**SOALAN**

**PUAN ALICE LAU KIONG YIENG [ LANANG ]** minta **MENTERI KESIHATAN** menyatakan status terkini penyakit Tibi (tuberculosis) di Sarawak dan di seluruh Malaysia dan berapa jumlah kematian yang disebabkan oleh "tuberculosis" serta apakah langkah yang lebih drastik diambil oleh Kementerian untuk mengatasi penyakit Tibi.

**JAWAPAN**

**Tuan Yang di-Pertua,**

1. Penyakit **Tibi** adalah disebabkan oleh **jangkitan bakteria *Mycobacterium Tuberculosis*** yang **merebak melalui udara**. Jumlah kes Tibi yang **dilaporkan di Sarawak, sehingga 31 Mei 2020**, adalah **1,094 kes** ( 11%) berbanding keseluruhan jumlah kes Tibi Malaysia iaitu **9,736 kes**. Manakala jumlah kematian bagi tempoh yang sama (Januari hingga Mei 2020) bagi **Sarawak adalah 62 kematian** berbanding **584 kematian** Tibi seluruh Malaysia.

2. Kementerian Kesihatan Malaysia (KKM) sentiasa komited dalam melakukan penambahbaikan yang berterusan bagi mencegah dan mengawal penularan penyakit Tibi di Malaysia. KKM telah **menyediakan Pelan Strategik Kawalan Tibi Kebangsaan** (2016 hingga 2020) di mana **fokus** Kementerian Kesihatan adalah **memastikan saringan dan**



rawatan awal diberikan kepada pesakit sehingga sembuh dan tidak lagi menyebarkan penyakit kepada orang lain.

3. Antara tindakan drastik yang telah diambil oleh Kementerian Kesihatan berpandukan Pelan Strategik Kawalan Tibi Kebangsaan (2016-2020) adalah menyediakan garis panduan bagi diagnosa dan rawatan bagi mengawal jangkitan *Latent TB Infection* (LTBI). Garis panduan sedia ada bagi saringan kontak adalah ujian x-ray dada dan pemeriksaan kahak. Pertubuhan Kesihatan Sedunia (*World Health Organization* - WHO) dalam garis panduan terkini (2018) telah mencadangkan supaya kontak kepada kes Tibi positif menjalani saringan dan rawatan LTBI. Sehubungan itu, Kementerian Kesihatan telah melakukan projek rintis saringan kontak melalui ujian *interferon gamma release assay* (IGRA) bermula Julai hingga Disember 2019 ke atas enam (6) buah negeri iaitu Johor, Selangor, Wilayah Persekutuan Kuala Lumpur, Kelantan, Melaka dan Sabah. Hasil projek rintis ini mendapati daripada sejumlah 5,400 kontak yang disaring, sejumlah 1,400 kontak adalah positif ujian IGRA (25.9%). Kontak yang telah di diagnos LTBI ini telah dinasihatkan untuk mendapatkan rawatan LTBI.

4. Umumnya WHO menganggarkan hampir 20% populasi dunia dijangkiti LTBI di mana mereka ini mempunyai 5% hingga 10% risiko mendapat jangkitan Tibi aktif sepanjang hayat. Menyedari bahawa individu dengan LTBI adalah berisiko tinggi mendapat Tibi aktif, Kementerian Kesihatan pada tahun 2020 telah menyediakan peruntukan sejumlah RM1.3 juta bagi tujuan peluasan saringan kontak menggunakan kaedah IGRA ke semua negeri-negeri di Malaysia. Kementerian Kesihatan berharap inisiatif baru ini akan membantu mengawal dan mengurangkan beban penyakit Tibi di Malaysia.

Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK DR. HASAN BIN BAHROM [ TAMPIN ]**

**TARIKH : 4 OGOS 2020 (SELASA)**

**SOALAN**

**DATUK DR. HASAN BIN BAHROM [ TAMPIN ]** minta **PERDANA MENTERI** menyatakan apakah sumbangan yang telah dilakukan oleh institusi zakat dalam menangani COVID-19 dan apakah Kerajaan berhasrat untuk menubuhkan satu perbadanan zakat negara dalam memastikan kutipan dan agihan zakat lebih seragam.

**JAWAPAN**

**YB SENATOR DATUK DR. HAJI ZULKIFLI MOHAMAD AL-BAKRI,  
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Bagi membantu mereka yang terjejas sepanjang tempoh Perintah Kawalan Pergerakan ekoran penularan COVID-19 di Wilayah Persekutuan, MAIWP telah meluluskan keseluruhan sebanyak RM45.254 juta zakat bermula hari pertama PKP berkuatkuasa iaitu pada 18 Mac 2020 sehingga 29 Jun 2020.
2. Bantuan yang diberikan secara umumnya dikategorikan kepada 6 kategori penerima iaitu asnaf, golongan terjejas, barisan petugas hadapan, pelajar, NGO dan gelandangan.

3. Antara bentuk bantuan adalah memberikan Bantuan Zakat Khas tambahan sebanyak RM500 kepada 24,196 asnaf. Selain itu, MAIWP juga telah mempercepatkan penyaluran bantuan kewangan bulanan pada bulan pertama PKP diumumkan.
4. Bagi mereka yang terjejas pendapatan akibat PKP, MAIWP telah menyediakan Bantuan Zakat Kecemasan COVID-19 yang masih berterusan sehingga kini di mana penerimanya adalah seramai 16,776 penerima setakat ini.
5. MAIWP turut mengagihkan bantuan makanan harian kepada barisan petugas hadapan, menyalurkan bantuan kewangan bagi peralatan perubatan kepada 7 buah hospital dan bantuan peralatan PPE kepada Agensi Pengurusan Bencana Negara (NADMA).

**Tuan Yang di-Pertua,**

6. Berkaitan penubuhan satu perbadanan zakat negara, buat ketika ini Kerajaan Persekutuan bertindak sebagai penyelaras di peringkat Persekutuan melalui Jabatan Wakaf, Zakat dan Haji (JAWHAR) kerana menurut Butiran 1, Senarai 2 (Senarai Negeri), Jadual Kesembilan, Perlembagaan Persekutuan, hal ehwal Agama Islam termasuklah urusan berkaitan zakat adalah termasuk di bawah bidangkuasa pihak berkuasa kerajaan negeri melalui Majlis Agama Islam Negeri (MAIN) dengan Duli Yang Maha Mulia Sultan atau Raja bertindak selaku Ketua Agama Islam Negeri. Manakala bagi Wilayah Persekutuan, Sabah, Sarawak dan Pulau Pinang maka Seri Paduka Baginda Yang Di-Pertuan Agong adalah bertindak selaku Ketua Agama Islam.
7. Oleh yang demikian, pelaksanaan aktiviti kutipan dan agihan zakat adalah berbeza bagi setiap negeri mengikut dasar dan pertimbangan pihak berkuasa agama Islam negeri masing-masing dan Kerajaan Persekutuan tidak boleh mencampuri urusan dalam perkara berkenaan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN VIVIAN WONG SHIR YEE [ SANDAKAN ]**

**TARIKH : 4 OGOS 2020 (SELASA)**

**SOALAN**

**PUAN VIVIAN WONG SHIR YEE [ SANDAKAN ]** minta **MENTERI KESIHATAN** menyatakan apakah status terkini untuk membina satu makmal ujian yang baru di Sandakan seperti yang diumumkan pada 14 April 2020 oleh Kementerian sebagai salah satu daripada usaha untuk meningkatkan kemampuan melakukan ujian.

**JAWAPAN**

**Tuan Yang di-Pertua,**

1. Kementerian Kesihatan Malaysia telah berjaya meningkatkan kemampuan ujian makmal RT PCR COVID-19 daripada 1,000 ujian sehari pada Januari 2020 kepada 37,336 ujian sehari pada Julai 2020.
2. Pada peringkat awal pandemik, Kementerian Kesihatan Malaysia (KKM) **telah berusaha untuk mempertingkatkan keupayaan makmal COVID-19 di tahap optimum bagi menampung keperluan ujian COVID-19 di seluruh negara.** Sehubungan dengan itu, pada 14 April 2020, Kementerian Kesihatan telah memaklumkan mengenai **inisiatif untuk meningkatkan kapasiti ujian makmal negara.**
3. Antara usaha yang dilakukan adalah seperti berikut:
  - 3.1. **Mewujudkan kolaborasi** dengan makmal-makmal swasta, Angkatan Tentera Malaysia (ATM) dan Universiti.

3.2. Menenalpasti makmal-makmal sedia ada bagi menjalankan ujian COVID-19 melalui kaedah berikut:

3.2.1. **Melibatkan makmal-makmal yang telah mempunyai platform ujian molekular sedia ada** (mesin automasi *Genexpert*) untuk menjalankan ujian COVID-19.

3.2.2. Mewujudkan perkhidmatan ujian molekular di makmal-makmal hospital lain secara:

(i) **penubuhan makmal molekular lengkap** (bagi makmal-makmal yang mempunyai kepakaran mikrobiologi); atau

(ii) **perolehan baru mesin automasi *GeneXpert*** (yang boleh dikendalikan oleh pegawai makmal tanpa memerlukan makmal molecular lengkap).

Tuan Yang di-Pertua,

4. **Hospital Sandakan** telah dikenalpasti sebagai salah satu makmal hospital yang terlibat di dalam peluasan ini. **Kaedah peluasan** yang dicadangkan adalah **dengan cara perolehan mesin baru automasi *GeneXpert*** dan bukannya dengan membina satu makmal baru seperti yang dinyatakan.

5. Walaupun bilangan kes harian COVID-19 semakin menurun, Kementerian menetapkan untuk meneruskan inisiatif ini kerana perancangan ini masih relevan selaras dengan enam (6) perkara utama bagi *exit policy* oleh *World Health Organization* (WHO) mengenai keperluan memastikan negara mempunyai keupayaan yang mencukupi bagi pengesanan dan ujian COVID-19.

Sekian, terima kasih.

**PEMBERITAHUAN PERTANYAAN BAGI JAWAPAN LISAN  
MESYUARAT KEDUA, PENGGAL PERTAMA,  
PARLIMEN KEEMPAT BELAS,  
MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : TUAN CHARLES ANTHONY SANTIAGO  
[KLANG]**

**TARIKH : 4 OGOS 2020 (SELASA)**

**SOALAN**

**TUAN CHARLES ANTHONY SANTIAGO [KLANG]** minta **PERDANA MENTERI** menyatakan pelan Kerajaan bagi membantu golongan B40 yang hilang punca pendapatan dan tidak mampu membayar sewa rumah atau sewa pejabat disebabkan oleh PKP. Apakah langkah-langkah akan diambil Kerajaan supaya penghuni rumah sewa dan pejabat tidak dihalau dengan serta merta.

**JAWAPAN : YB DATO' TAKIYUDDIN BIN HASSAN**  
**MENTERI DI JABATAN PERDANA MENTERI**

**Tuan Yang di-Pertua,**

Penularan pandemik COVID-19 telah mencetuskan krisis kesihatan serta menjejaskan keadaan ekonomi dan sosial di seluruh dunia termasuk Malaysia. Dalam hal ini, kerajaan mendapati bahawa golongan B40 antara kumpulan masyarakat yang paling terkesan akibat penularan COVID-19 kerana hilang punca pendapatan selain daripada syarikat-syarikat berskala kecil dan sederhana. Justeru, bagi membantu individu dan syarikat-syarikat yang kehilangan punca pendapatan dan berhadapan dengan ketidakmampuan memenuhi obligasi kontraktual seperti pembayaran sewa, maka Kerajaan telah mengambil langkah menggubal Rang Undang-Undang Langkah Sementara Untuk Mengurangkan Kesan COVID-19 sebagai suatu mekanisme perundangan bagi meringankan beban yang ditanggung akibat COVID-19.

Melalui Rang Undang-Undang ini masalah ketidakmampuan memenuhi obligasi kontraktual yang berlaku sepanjang tempoh kuatkuasa dapat ditangani melalui pengubahsuaian (*modification*) kepada akta yang berkaitan termasuk ketidakmampuan membayar sewa rumah atau sewa pejabat. RUU ini merupakan pelepasan sementara atau *temporary relief* daripada tanggungjawab perjanjian bagi suatu tempoh yang ditetapkan dengan harapan kelangsungan hidup rakyat Malaysia umumnya seperti kumpulan B40 dapat diteruskan.

**Tuan Yang di-Pertua,**

Untuk makluman semua, Rang Undang-Undang Langkah Pencegahan Sementara untuk Mengurangkan Kesan COVID-19 ini akan dibentangkan dalam sesi Parlimen yang sedang bersidang pada masa ini. Terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHOW KON YEOW [ TANJONG ]**

**TARIKH : 4 OGOS 2020 (SELASA)**

**SOALAN**

**TUAN CHOW KON YEOW [ TANJONG ]** minta **MENTERI KESIHATAN** menyatakan sebab dan jumlah kos yang terlibat ekoran kelewatan pelaksanaan projek multi blok Hospital Seberang Jaya, Pulau Pinang. Perincian perkembangan projek berkaitan sehingga kini dan nyatakan juga projek-projek naik taraf hospital-hospital di Pulau Pinang sehingga tahun 2023 serta tempoh pelaksanaannya.



**JAWAPAN**

**Tuan Yang di-Pertua,**

1. Projek Pembinaan *Multi Storey Block* Hospital Seberang Jaya, Pulau Pinang mengalami kelewatan berikutan **masalah pelantikan *Nominated Sub-Contractor* (NSC)** yang mana **perlu ditender semula**. Walau bagaimanapun, proses tender NSC telah pun selesai pada masa ini dan pihak Kontraktor Utama telah diberikan lanjutan masa. **Tarikh penyiapan baharu bagi projek ini** setelah mengambilkira pelanjutan masa yang diberikan atas sebab Perintah Kawalan Pergerakan (PKP), Perintah Kawalan Pergerakan Bersyarat (PKPB) dan Perintah Kawalan Pergerakan Pemulihan (PKPP) **adalah pada September 2022**. Berdasarkan kepada status semasa pelaksanaan projek, kemajuan kerja Kontraktor sehingga 30 Jun 2020 adalah 36.21% sebenar berbanding jadual 49.10%. Pada masa ini, 17 NSC yang dilantik telah memulakan kerja ditapak bina setelah proses tender NSC selesai sepenuhnya. **Kos projek yang diluluskan bagi projek ini adalah RM486.2 juta**.

2. Pihak Kontraktor sedang giat untuk menyiapkan kerja-kerja struktur utama bangunan berkenaan. Pihak Kementerian Kesihatan dan Jabatan Kerja Raya (JKR) sedang memantau rapi pelaksanaan projek ini agar ia dapat disiapkan mengikut tempoh kontrak yang ditetapkan.

3. Selain projek *Multi Storey Block* Hospital Seberang Jaya, Pulau Pinang, terdapat tujuh (7) projek naik taraf Hospital yang telah diluluskan oleh pihak Kerajaan seperti berikut:

3.1 **Projek Naiktaraf Hospital Pulau Pinang** (Fasa 2) (Telah siap pada 21 Mei 2019, Kos RM22.09 Juta).

3.2 **Projek Naiktaraf Hospital Seberang Jaya, Seberang Perai Tengah, Pulau Pinang** (Telah siap pada 1 April 2019, Kos RM22.09 Juta).

- 3.3 **Projek Naiktaraf Jabatan Kecemasan dan Pesakit Luar Hospital Balik Pulau, Pulau Pinang** (Jangka siap pada 6 Oktober 2020, Kos RM28.97 Juta).
- 3.4 **Pembinaan *Modular Operating Theatre* Untuk Hospital Balik Pulau, Pulau Pinang** (Jangka siap pada 21 Oktober 2020, Kos RM7.07 juta).
- 3.5 **Projek Membina Blok Baharu Pusat Perkhidmatan Stem Sel, Hospital Pulau Pinang** (Projek dalam perancangan tender semula dan peringkat penyediaan dokumen tender. Tempoh pembinaan selama 2 Tahun (2020-2022), Kos RM19.15 Juta).
- 3.6 **Projek Blok Wanita Dan Kanak-Kanak Hospital Pulau Pinang** (Telah ditender pada 15 Disember 2018 dan peringkat penilaian semula oleh Lembaga Tender. Jangka SST dikeluarkan pada Oktober 2020 dan tempoh pembinaan selama 4 tahun (2020-2024), Kos RM296.98 juta).
- 3.7 **Projek Blok Klinik Pakar dan Wad Hospital Pulau Pinang** (Jangka tender pada Julai 2021, Tempoh pembinaan selama 4 Tahun (2021-2025), Kos RM500 Juta).

Sekian, terima kasih.

**PEMBERITAHUAN PERTANYAAN  
MESYUARAT KEDUA, PENGGAL KETIGA  
PARLIMEN KEEMPAT BELAS DEWAN RAKYAT**

---

**PERTANYAAN : LISAN**

**DARIPADA : TUAN AHMAD TARMIZI BIN SULAIMAN [ SIK ]**

**TARIKH : 4 OGOS 2020**

**SOALAN**

**TUAN AHMAD TARMIZI BIN SULAIMAN [ SIK ]** minta **PERDANA MENTERI** menyatakan usaha-usaha yang dilakukan Kerajaan bagi merealisasikan syor Jawatankuasa Tertinggi Hal Ehwal Islam yang pernah dibentuk oleh Majlis Raja-Raja selepas Mei 2018.

**JAWAPAN**

**YB SENATOR DATUK DR. ZULKIFLI MOHAMAD AL-BAKRI  
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

Kerajaan komited untuk melaksanakan syor-syor penting Jawatankuasa Tertinggi Hal Ehwal Islam. Walau bagaimanapun, kerajaan masih meneliti dengan mendalam syor-syor tersebut di peringkat kementerian dan akan diangkat kepada Mesyuarat Jemaah Menteri untuk mendapatkan pertimbangan dan kelulusan.

Sekian, terima kasih.

**PEMBERITAHUAN PERTANYAAN DEWAN RAKYAT,  
MESYUARAT KEDUA, PENGGAL KETIGA,  
PARLIMEN KEEMPAT BELAS  
TAHUN 2020**

**PERTANYAAN : LISAN**

**DARIPADA : PUAN RUSNAH BINTI ALUAI (TANGGA BATU)**

**TARIKH : 4 OGOS 2020 (SELASA)**

**SOALAN**

Minta **MENTERI PERTAHANAN** menyatakan bilakah agaknya pembayaran 'one off payment' yang telah dijanjikan akan dilaksanakan kepada anggota tentera yang telah menerima Pingat Jasa Malaysia (PJM).

**JAWAPAN**

Tuan Yang di-Pertua,

Kementerian Pertahanan melalui Jabatan Hal Ehwal Veteran (JHEV) ATM telah selesai membuat pembayaran Elaun Kenangan Pingat Jasa Malaysia (PJM) secara *one-off* sebanyak RM500 pada bulan Mac 2020 kepada 70,000 Veteran ATM yang melibatkan peruntukan berjumlah RM35 juta.

Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN TAN KOK WAI (DAP)**

**TARIKH : 4 OGOS 2020**

**SOALAN**

**TUAN TAN KOK WAI [ CHERAS ]** minta **MENTERI LUAR NEGERI** menyatakan sama ada Kerajaan akan menyemak atau mengekal Kerangka Dasar Luar Negeri 2019, hubungan dengan China, Jepun dan Amerika Syarikat

**JAWAPAN**

Tuan Yang di-Pertua,

Pertama sekali, saya ingin mengucapkan terima kasih kepada Yang Berhormat Cheras di atas soalan yang dikemukakan.

2. Merujuk kepada soalan yang diajukan, prinsip asas dasar luar Malaysia masih kekal sejak kemerdekaan. Walau bagaimanapun, Kerajaan sentiasa melakukan perubahan kepada pendekatan Dasar Luar Negeri sejajar dengan keperluan domestik dan cabaran-cabaran geopolitik.

3. Perkara ini sentiasa bersifat dinamik, ia bersandarkan kepada jalinan hubungan diplomatik Malaysia dengan semua negara. Malaysia harus melibatkan diri secara aktif dalam negara-negara berkecuali (*non-aligned*) dan berusaha untuk menyumbang secara positif ke arah penyelesaian konflik secara aman di serata dunia.

4. Untuk makluman ahli dewan, Landskap Domestik, Serantau dan Antarabangsa mengalami perubahan yang ketara disebabkan oleh perkembangan terkini termasuklah penularan pandemik COVID-19.
5. Maka disebabkan hal tersebut, Kerajaan perlu mengambil pendekatan pelaksanaan diplomasi yang lebih proaktif dan responsif. Ini termasuklah dengan mengambil kira landskap baru global yang perlu diteliti dan diselami bersama.
6. Oleh demikian, harus saya tekankan bahawa Malaysia mengamalkan prinsip berkecuali dan menjalinkan hubungan dengan negara-negara lain tanpa mengira ideologi. Negara kita juga tidak mencampuri urusan dalaman sesebuah negara lain dan posisi ini akan sentiasa menjadi teras Dasar Luar Negeri Malaysia.
7. Sidang dewan yang dihormati, Malaysia bukan sahaja sebagai negara rakan dagang, tetapi Malaysia merupakan sebuah negara berdaulat yang perlu dipelihara maruah, kedaulatan dan integritinya, disamping menjunjung prinsip-prinsip asas dan memelihara kepentingan negara.
8. Bagi negara-negara yang disenaraikan iaitu China, Jepun dan Amerika Syarikat, mereka bukan sahaja rakan dagang utama kepada Malaysia tetapi mereka juga merupakan rakan rapat dalam kepentingan yang lain seperti geo-politik, sosial, sains dan teknologi dan banyak lagi.
9. Justeru, Kerajaan akan berterusan memupuk hubungan yang baik dan akrab dengan negara-negara tersebut dan juga negara-negara yang lain agar kedaulatan dan kepentingan negara kita sentiasa dipertahankan dan dipelihara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DATUK LIEW VUI KEONG [BATU SAPI]**

**TARIKH : 4 OGOS 2020**

**SOALAN**

**DATUK LIEW VUI KEONG [ BATU SAPI ]** minta **MENTERI LUAR NEGERI** menyatakan status terkini kes timbang tara (arbitration) ad hoc berkenaan tuntutan wilayah ke atas negeri Sabah yang difailkan oleh waris Sultan Sulu terhadap Malaysia di Sepanyol.

**JAWAPAN**

Tuan Yang di-Pertua,

Saya mengucapkan terima kasih kepada Yang Berhormat atas pertanyaan yang telah dikemukakan.

2. Untuk makluman Dewan yang mulia ini, Malaysia dan Filipina sentiasa menikmati hubungan dua hala yang erat dan hubungan yang akrab ini terbukti melalui pelbagai dimensi dan kerjasama yang terjalin setelah sekian lama antara Malaysia dan Filipina yang merangkumi pelbagai bidang khususnya dalam pertahanan dan keselamatan selain ekonomi.

3. Sehingga kini, kedua-dua negara sentiasa mengikrarkan komitmen untuk mengeratkan lagi jalinan kerjasama yang sedia ada serta mencari kerjasama-kerjasama baharu di dalam usaha mempertingkatkan lagi keakraban ini. TYT Rodrigo Duterte, Presiden Republik Filipina juga telah mengadakan lawatan ke Malaysia sebanyak dua (2) kali iaitu pada 2016 dan 2018 bagi membincangkan isu-isu yang berkepentingan bersama.

Tuan Yang di-Pertua,

4. Ingin saya tekankan bahawa Kerajaan Malaysia memuktamadkan pendirian kita mengenai tuntutan ke atas Sabah. Pendirian ini telah disuarakan setegas-tegasnya. Malaysia telah beberapa kali menjelaskan bahawa kita tidak mengiktiraf dan tidak akan melayan sebarang tuntutan oleh mana-mana pihak ke atas Sabah memandangkan Sabah telah diiktiraf oleh Pertubuhan Bangsa-Bangsa Bersatu (PBB) dan masyarakat antarabangsa sebagai sebahagian daripada Malaysia sejak 16 September 1963.

5. Pada 27 Julai 2020, Setiausaha Luar Negeri Filipina, Theodore Locsin, telah mengeluarkan kenyataan melalui media sosial beliau (Twitter) berkenaan isu Sabah. Beliau telah membalas twitter yang dikeluarkan oleh Kedutaan Besar Amerika Syarikat di Filipina berkenaan bantuan kit *hygiene* yang telah dibekalkan kepada PATI Filipina yang baru pulang ke Mindanao dari negeri Sabah. Menurut beliau, ***“Sabah is not in Malaysia if you want to have anything to do with the Philippines”***.

6. Pada 3 Ogos 2020, Kementerian Luar Negeri telah memanggil Duta Besar Republik Filipina untuk mendapatkan penjelasan berkenaan perkara ini dan menyatakan sebarang kenyataan yang merujuk atau mengaitkan tuntutan terhadap Sabah adalah tidak wajar dan (dianggap) sebagai tidak mesra dengan Malaysia.

7. Malaysia meletakkan kepentingan tinggi dan amat menghargai hubungan dengan Filipina secara dua hala serta sebagai rakan kongsi dalam ASEAN, di samping sebagai rakan anggota lain-lain organisasi serantau dan antarabangsa.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN MUHAMMAD BAKHTIAR  
BIN WAN CHIK [ BALIK PULAU ]**

**TARIKH : 4 OGOS 2020**

**SOALAN**

**YB TUAN MUHAMMAD BAKHTIAR BIN WAN CHIK [BALIK PULAU]** minta **PERDANA MENTERI** menyatakan pendapatan tahunan, elaun mesyuarat dan kemudahan yang diterima termasuklah kepada semua duta-duta bertaraf Menteri bagi setiap perjawatan yang dilantik di bawah kuasa Perdana Menteri. Mohon Perdana Menteri nyatakan adakah Kerajaan Pakatan Nasional akan melaksanakan Pengisytiharan Harta di kalangan Jemaah Menteri kerajaan sekarang.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Untuk makluman Yang Berhormat, Perdana Menteri melantik beberapa Duta Khas bagi menasihati dan membantu Perdana Menteri dalam sesuatu perkara berkaitan pentadbiran Kerajaan.
2. Duta-duta Khas kepada Perdana Menteri diberi saraan bersesuaian dengan kelayakan, tugas dan tanggungjawab yang dipikul. Duta Khas bertaraf Menteri tidak diberi apa-apa elaun mesyuarat.
3. Kerajaan Perikatan Nasional secara prinsipnya mewajibkan semua Ahli Kabinet untuk mengisytiharkan harta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SIVAKUMAR VARATHARAJU NAIDU  
[ BATU GAJAH ]**

**TARIKH : 4 OGOS 2020 (SELASA)**

**SOALAN**

minta **PERPADUAN NEGARA** menyatakan tentang usaha-usaha Kerajaan untuk memupuk perpaduan di kalangan anak-anak muda. Apakah tindakan yang diambil oleh Kerajaan terhadap mereka yang sengaja mengangkat isu-isu perkauman dan agama yang sensitif melalui media sosial dengan tujuan memecahbelahkan rakyat.

**JAWAPAN**

Yang di-Pertua,

**Usaha Memupuk Perpaduan di Kalangan Anak Muda**

Kementerian Perpaduan Negara melaksanakan pelbagai usaha untuk memupuk semangat perpaduan dalam kalangan rakyat Malaysia terutamanya dalam kalangan anak-anak muda seperti berikut:

- Pelaksanaan Pelan Tindakan Perpaduan Negara (PTPN) bagi memastikan agenda perpaduan nasional dapat diterapkan secara menyeluruh menerusi elemen-elemen kepercayaan dan jati diri yang teguh berlandaskan kepada prinsip Rukun Negara;
- Program perpaduan pelbagai kaum secara berterusan melalui Jiran Muda (JM) Kawasan Rukun Tetangga dan seterusnya SRS;
- Pelaksanaan Modul Silang Budaya dimana intipati utama modul ini adalah seperti berikut:
  - a. Budaya Dan Adat Resam
  - b. Kenegaraan
  - c. Moral Dan Sivik

**Langkah Bagi Mengekang Isu-Isu Perkauman Dan Agama Melalui Media Sosial**

Kerajaan akan mengambil beberapa tindakan bagi mengekang isu-isu perkauman dan agama melalui media sosial untuk memlihara dan mengukuhkan perpaduan dalam kalangan masyarakat berbilang kaum di Malaysia seperti berikut:

- a) Masyarakat perlu dididik untuk memahami dan menghormati undang-undang.

b) Di bawah undang-undang sedia ada, mana-mana pihak dengan sengaja mencetuskan atau mengeluarkan sebarang kenyataan yang menggugat perpaduan dan keharmonian rakyat boleh disiasat dan didakwa di bawah akta-akta berikut;

- i. subseksyen 4(1) Akta Hasutan 1948 [Akta 15] iaitu kesalahan menghasut;
- ii. seksyen 504 Kanun Keseksaan [Akta 574] iaitu kesalahan dengan sengaja mengaibkan dengan niat hendak membangkitkan pecah keamanan;
- iii. seksyen 505 Kanun Keseksaan [Akta 574] iaitu kesalahan mengeluarkan kenyataan-kenyataan yang mendatangkan khianat awam;
- iv. seksyen 506 Kanun Keseksaan [Akta 574] iaitu kesalahan menakutkan secara jenayah;
- v. seksyen 233 Akta Komunikasi dan Multimedia 1998 [Akta 588] iaitu kesalahan penggunaan tidak wajar kemudahan rangkaian atau perkhidmatan rangkaian.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK ROZMAN BIN ISLI [LABUAN]**

**TARIKH : 4 OGOS 2020 (SELASA )**

**SOALAN**

Minta **PERDANA MENTERI** menyatakan apakah perancangan Kerajaan dalam membangunkan kawasan-kawasan di Menumbok, Sabah sehingga ke Pekan Kuala Penyu, Sabah. Tidakkah Menteri merasakan kawasan ini patut dibangunkan sebagai kawasan perindustrian berasaskan eksport dan menggunakan Pelabuhan Labuan untuk penghantaran ke pasaran di luar negara.

**JAWAPAN**

**YB DATUK SERI PANGLIMA DR. MAXIMUS JOHNNITY ONGKILI,  
MENTERI DI JABATAN PERDANA MENTERI (HAL EHWAL SABAH  
DAN SARAWAK)**

**Tuan Yang di-Pertua,**

1. Untuk makluman Yang Berhormat, tumpuan Kerajaan adalah ke arah memastikan pembangunan yang seimbang dilaksanakan merentasi wilayah dan negeri. Ia adalah penting bagi memastikan supaya setiap lapisan masyarakat dapat menikmati pembangunan yang adil dan saksama serta kesejahteraan semua rakyat terjamin berdasarkan konsep Kemakmuran Bersama atau "*shared prosperity*".
2. Selaras dengan matlamat Wawasan Kemakmuran Bersama 2030 (WKB) untuk menyediakan taraf hidup yang wajar (*decent standard of living*) kepada semua rakyat Malaysia, fokus Kerajaan tertumpu kepada usaha untuk menangani jurang kekayaan dan pendapatan, merentasi wilayah termasuk negeri-negeri serta penduduk luar bandar dan bandar. Ini adalah penting supaya negeri-negeri kurang membangun dan golongan penduduk yang ketinggalan dapat dibawa bersama dalam arus kemajuan negara, nasib mereka terbela dan keupayaan ekonomi mereka diperkasakan.
3. Dalam tempoh dua tahun terakhir RMKe-11, peruntukan pembangunan Kerajaan Persekutuan diagih dengan keutamaan diberi kepada enam negeri yang kurang membangun, termasuk negeri Sabah. Di bawah *Rolling Plan 4* (2020) RMKe-11, negeri Sabah telah pun diperuntukkan sejumlah RM5.01 bilion atau 8.9% daripada jumlah keseluruhan peruntukan pembangunan. Peruntukan tersebut bagi melaksanakan sebanyak 148 projek baharu dan 616 projek sambungan melalui pelbagai kementerian. Bagi kawasan Beaufort khususnya yang mana turut meliputi Kuala Penyu, Kerajaan telah memperuntukkan sebanyak RM93 juta di bawah *Rolling Plan 4* (2020) RMKe-11 untuk

pelaksanaan projek-projek pembangunan di bawah pelbagai kementerian.

**Tuan Yang di-Pertua,**

4. Kerajaan sedar bahawa Pelabuhan Labuan mempunyai potensi untuk menjadi hub *transshipment* dan kargo dengan menawarkan kemudahan dan peralatan untuk pengendalian kontena, kargo pukal cecair dan kering serta kargo am. Pada 2018, Pelabuhan Labuan telah mencatatkan jumlah kendalian kargo sebanyak 396,319 tan, kendalian kontena sebanyak 23,940 unit bersamaan dua puluh kaki (TEU) dan bilangan singgahan kapal sebanyak 615. Walau bagaimanapun, Pelabuhan Labuan (yang kini terletak di bawah bidang kuasa Lembaga Pelabuhan Bintulu) hanya mengendalikan aktiviti sebagai hub pemindahan komoditi berikutan pelabuhan ini mempunyai kapasiti dan ketersambungan (*connectivity*) yang terhad. Kapal-kapal kontena lebih memilih untuk berlabuh di Pelabuhan Klang, Pelabuhan Tanjung Pelepas dan Pelabuhan Tuas, Singapura bagi tujuan *transshipment*.

5. Justeru, perancangan yang teliti harus dibuat sekiranya Kerajaan berhasrat untuk membangunkan kawasan perindustrian dan menjadikan Pelabuhan Labuan sebagai hub kerana ia akan melibatkan pelaburan yang besar. Ini adalah penting supaya tidak berlaku persaingan di kalangan pelabuhan tempatan dan mengelakkan kerugian pelabur. Tambahan pula, pada masa yang sama, Pelabuhan Sepanggar, Sabah juga sedang dalam proses menaik taraf kemudahan dan meningkatkan kapasiti pelabuhan untuk menambah baik kecekapan dan keupayaan operasi *transshipment*.

6. Secara amnya, usaha yang dilaksanakan oleh Kerajaan dalam memastikan pembangunan wilayah lebih seimbang merentasi semua negeri diharap akan menyumbang ke arah mencapai pertumbuhan yang inklusif serta memastikan kesejahteraan seluruh rakyat Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN AHMAD FADHLI BIN SHAARI  
[PASIR MAS]**

**TARIKH : 04 OGOS 2020 (SELASA)**

**SOALAN**

**YB TUAN AHMAD FADHLI BIN SHAARI (PASIR MAS)** minta **PERDANA MENTERI** menyatakan adakah Kerajaan berhasrat untuk membuka semula siasatan kes rasuah melibatkan bekas Menteri Kewangan di dalam urusan jual beli banglo yang telah ditarik balik pendakwaan ketika pentadbiran Kerajaan Pakatan Harapan.

**JAWAPAN : YB DATO' TAKIYUDDIN BIN HASSAN,  
MENTERI DI JABATAN PERDANA MENTERI (PARLIMEN DAN  
UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, kes banglo ini telah dimohon oleh Peguam Negara pada ketika itu untuk *DNAA (discharge not amounting to acquittal)*. DNAA bermaksud tertuduh dibebaskan tanpa dilepaskan dan bukan bermaksud pelepasan sepenuhnya. Namun demikian mahkamah setelah mendengar hujah pihak Peguam Negara terdapat *new lead*, mahkamah telah memberikan pelepasan sepenuhnya kepada tertuduh. Selepas itu Peguam Negara tidak lagi membuat apa-apa permohonan rayuan berhubung keputusan mahkamah.

2. SPRM adalah sebuah badan bebas dalam menjalankan penyiasatan terhadap kes-kes rasuah, salahguna kuasa dan penyelewengan. Tiada halangan untuk membuka semula siasatan sekiranya terdapat *fresh evidence* di dalam kes tersebut. Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK SERI SAIFUDDIN NASUTION  
BIN ISMAIL [KULIM BANDAR BAHARU]**

**TARIKH : 4 OGOS 2020 (SELASA)**

**SOALAN**

**YB DATUK SERI SAIFUDDIN NASUTION BIN ISMAIL [KULIM BANDAR BAHARU]** minta **PERDANA MENTERI** menyatakan sudahkah semua anggota jemaah menteri dan ahli-ahli "*backbenchers*" mengistiharkan harta. Jika belum bila akan dilakukan.

**JAWAPAN : YB DATO' TAKIYUDDIN BIN HASSAN,  
MENTERI DI JABATAN PERDANA MENTERI (PARLIMEN DAN  
UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, sehingga 29 Julai 2020 seramai 29 orang Jemaah Menteri telah mengemukakan sesalinan perisytiharan harta kepada Suruhanjaya Pencegahan Rasuah Malaysia (SPRM). Manakala bagi ahli-ahli *backbenchers* pula, SPRM belum menerima sepenuhnya sesalinan borang perisytiharan harta daripada mereka.

2. Pada masa ini, paparan pengisytiharan harta melalui laman web SPRM hanya akan dibuat setelah Kerajaan memutuskan satu kaedah baru dalam pemaparan mengenai jumlah harta/pendapatan yang telah diisytiharkan. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN GOBIND SINGH DEO [PUCHONG]**

**TARIKH : 4 OGOS 2020**

**SOALAN**

**YB TUAN GOBIND SINGH DEO [PUCHONG]** minta **PERDANA MENTERI** menyatakan alasan-alasan atas mana Riza Shahriz Abdul Aziz dilepas tanpa dibebaskan daripada pertuduhan pengubahan wang haram dan sekiranya ada, apakah persetujuan berkenaan wang-wang terlibat dalam kes tersebut dan status pelaksanaan persetujuan itu setakat sekarang.

**JAWAPAN : YB DATO' TAKIYUDDIN BIN HASSAN, MENTERI DI JABATAN PERDANA MENTERI (PARLIMEN DAN UNDANG-UNDANG)**

Tuan Yang di-Pertua,

1. Sebagaimana Ahli Yang Berhormat sedia maklum, Jabatan Peguam Negara melalui Kenyataan Media bertarikh 17 Mei 2020, telahpun menjelaskan mengenai tindakan yang diambil berhubung dengan kes Pendakwa Raya v Riza Shahriz bin Abdul Aziz.

2. Berdasarkan Fasal (3) Perkara 145 Perlembagaan Persekutuan, keputusan untuk memulakan, menjalankan, atau memberhentikan apa-apa prosiding bagi sesuatu kesalahan merupakan budi bicara Peguam Negara. Keputusan untuk memohon suatu perintah pelepasan tanpa pembebasan (DNAA) ke atas kelima-lima pertuduhan terhadap Riza

Shahriz bin Abdul Aziz dibuat selaras dengan Fasal (3) Perkara 145 Perlembagaan Persekutuan setelah membuat pertimbangan atas perkara-perkara yang berikut:

- (a) bahawa pada 18 November 2019, peguam cara kepada Riza Shahriz bin Abdul Aziz telah menghantar satu surat representasi kepada Jabatan Peguam Negara memohon agar semua pertuduhan terhadap Riza Aziz di Mahkamah Sesyen Kuala Lumpur dikaji semula. Surat representasi ini, antara lain, telah mencadangkan agar Riza Aziz—
  - (i) menyerahkan haknya ke atas tiga hartanah yang telah disita oleh Jabatan Kehakiman Amerika Syarikat dan Riza Aziz perlu memberikan kerjasama untuk mengembalikan harta-harta tersebut atau nilainya kepada Kerajaan Malaysia. Hartanah tersebut adalah :
    - a. satu unit banglo di Beverly Hills, California;
    - b. satu unit pangsapuri di New York; dan
    - c. satu unit rumah bandar di London, United Kingdom;
  - (ii) bersetuju agar wang yang dirampas daripadanya yang menjadi hal perkara dalam satu kes di Mahkamah Tinggi Kuala Lumpur, dilucuthakkan kepada Kerajaan Malaysia; dan
  - (iii) membayar sejumlah kompaun selaras dengan peruntukan seksyen 92 Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 [*Akta 613*];
- (b) bahawa Peguam Negara pada masa itu, Tan Sri Tommy Thomas, setelah meneliti surat representasi yang dihantar oleh peguam cara kepada Riza Shahriz bin Abdul Aziz itu, melalui minit bertarikh 19 November 2019 telah memohon pandangan daripada Timbalan Kanan Pendakwa Raya Dato' Seri Gopal Sri

Ram dan turut menyatakan berdasarkan cadangan-cadangan yang dinyatakan di atas, beliau bersedia untuk memberikan pertimbangan kepada representasi tersebut;

- (c) bahawa Dato' Seri Gopal Sri Ram, setelah berbincang dengan Puan Latheefa Koya, Ketua Pesuruhjaya SPRM pada masa itu, telah mencadangkan agar cadangan-cadangan yang dinyatakan dalam representasi tersebut diterima oleh SPRM. Peguam Negara juga telah dinasihatkan bahawa Tan Sri Tommy Thomas telah secara prinsip bersetuju dengan cadangan tersebut. Ini telah membuka jalan kepada rundingan lanjut dan perancangan mekanisme yang perlu diambil, diadakan;
- (d) bahawa pada 11 Mac 2020, peguam cara kepada Riza Shahriz bin Abdul Aziz telah menghantar satu lagi surat representasi yang mengukuhkan cadangan-cadangan yang telah dikemukakan sebelum ini dan memberikan aku janji bahawa, sekiranya Riza Aziz gagal untuk mematuhi mana-mana terma dan syarat yang dinyatakan, kelima-lima pertuduhan pengubahan wang haram yang dikenakan ke atasnya dikekalkan; dan
- (e) bahawa pendirian terdahulu Tan Sri Tommy Thomas telah ditaklimatkan oleh Timbalan-Timbalan Pendakwa Raya yang mengendalikan perkara ini dan Peguam Negara bersependapat dengan pandangan Tan Sri Tommy Thomas sebagaimana yang telah ditaklimatkan itu dan Peguam Negara telah bersetuju untuk menerima tawaran Riza Aziz tertakluk kepada pematuhan yang ketat terhadap semua terma dan syarat.

3. Sehubungan dengan persetujuan itu, pada 16 April 2020, pihak SPRM telah membalas surat peguam cara kepada Riza Shahriz bin Abdul Aziz yang secara asasnya menyatakan bahawa Pendakwa Raya bersedia untuk memohon satu perintah pelepasan tanpa pembebasan (DNAA) ke atas kelima-lima pertuduhan tertakluk kepada Riza Aziz mengambil langkah-langkah untuk memastikan semua wang dan harta-

harta yang disita dikembalikan kepada Kerajaan Malaysia dan seterusnya membayar kompaun selaras dengan seksyen 92 Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 [*Akta 613*].

4. Seterusnya, pada 21 April 2020, pihak SPRM telah menulis kepada pihak peguam cara kepada Riza Shahriz bin Abdul Aziz mengarahkan agar Riza Aziz turut melepaskan hak, hak milik, dan kepentingannya ke atas satu lagi aset yang dikenali sebagai "*Metropolis Poster*" yang merupakan sebuah poster 3-helai berwarna litograf berbingkai ciptaan seorang pelukis dari Jerman bernama Heinz Schulz-Neudamm untuk filem senyap bertajuk "*Metropolis*" yang telah diterbitkan pada tahun 1927.

5. Pada 13 Mei 2020, pihak SPRM sekali lagi telah menulis kepada pihak peguam cara kepada Riza Shahriz bin Abdul Aziz mengarahkan Riza Aziz untuk turut memindahkan sejumlah USD14,087,072.76 yang berada di dalam satu akaun *escrow* di Huntington National Bank di Amerika Syarikat kepada Kerajaan Malaysia.

6. Lanjutan daripada perkiraan ini, Kerajaan Malaysia dijangka akan menerima kembali sejumlah kira-kira USD108 juta (tertakluk kepada harga jualan sebenar aset-aset dan penolakan apa-apa kos) untuk dikreditkan ke dalam Akaun Amanah Pemulihan Aset 1MDB. Ini adalah tambahan kepada USD57,036,688.68 yang telah dilucuthak sebelum ini pada bulan April 2019 daripada Red Granite Pictures, sebuah syarikat yang dimiliki bersama oleh Riza Aziz, yang dana tersebut dapat dikesan berkaitan dengan 1MDB.

7. Ditekankan bahawa keputusan untuk memohon perintah pelepasan tanpa pembebasan (DNAA) terhadap Riza Aziz dibuat tertakluk pematuhan Riza Aziz terhadap syarat-syarat yang dikenakan. Keseluruhan perkiraan ini adalah sebahagian daripada usaha berterusan Kerajaan dalam mendapatkan kembali aset-aset berkaitan dengan 1MDB. Rundingan tersebut adalah amat rumit, memerlukan kerjasama erat dengan pihak berkuasa di luar negara, dan masih berterusan. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN AHMAD FAHMI BIN  
MOHAMED FADZIL [LEMBAH PANTAI]**

**TARIKH : 4 OGOS 2020 (SELASA)**

**SOALAN**

**YB TUAN AHMAD FAHMI BIN MOHAMED FADZIL (LEMBAH PANTAI)** minta **PERDANA MENTERI** menyatakan jumlah Ahli Parlimen yang telah mengisytihar harta setakat hari ini dan adakah Kerajaan bercadang memuat naik perisytiharan harta ke dalam laman sesawang Suruhanjaya Pencegahan Rasuah Malaysia seperti yang diamalkan dahulu.

**JAWAPAN : YB DATO' TAKIYUDDIN BIN HASSAN, MENTERI DI  
JABATAN PERDANA MENTERI (PARLIMEN DAN UNDANG-  
UNDANG)**

**Tuan Yang di-Pertua,**

1. Untuk makluman Ahli Yang Berhormat, sehingga 29 Julai 2020 seramai 184 orang Ahli Parlimen telah mengemukakan sesalinan perisytiharan harta kepada Suruhanjaya Pencegahan Rasuah Malaysia (SPRM).

2. SPRM hanya menyediakan *platform* untuk pemaparan harta melalui *website* dan bukan menjadi tanggungjawab SPRM untuk memaksa mana-mana pihak untuk mengisytiharkan harta mereka. SPRM telah diberikan mandat oleh Kerajaan untuk menentukan masa dan kaedah pemaparan perisytiharan harta. Pemaparan akan dibuat dalam tempoh masa yang terdekat. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN SIM CHEE KEONG  
[BUKIT MERTA JAM]**

**TARIKH : 4 OGOS 2020 (SELASA)**

**SOALAN**

Minta **PERDANA MENTERI** menyatakan kos, vendor/pemaju, agensi yang bertanggungjawab dan perbezaan fungsi aplikasi Mytrace, Mysejahtera dan Gerak Malaysia, nyatakan keperluan untuk mewujudkan 3 aplikasi berbeza.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Aplikasi MySejahtera dibangunkan berdasarkan kepada keperluan Kementerian Kesihatan Malaysia (KKM) yang memerlukan kerjasama komuniti untuk membantu KKM dalam mengawal penularan wabak COVID-19. Pihak KKM telah memohon bantuan Agensi Keselamatan Siber Negara (NACSA), serta Unit Pemodenan Tadbiran dan Perancangan Pengurusan Malaysia (MAMPU) untuk menilai aplikasi yang dibangunkan oleh syarikat KPISoft Malaysia Sdn. Bhd. secara *Corporate Social Responsibility* (CSR) untuk dijadikan aplikasi di peringkat nasional.

2. Pihak NACSA dan MAMPU selanjutnya telah melaksanakan penilaian daripada aspek ketersediaan serta kemampuan aplikasi tersebut untuk memenuhi keperluan KKM dalam mengurus wabak COVID-19 yang bersifat dinamik. Pada masa yang sama, penilaian juga dilaksanakan terhadap aplikasi-aplikasi lain yang turut ditawarkan kepada Kerajaan, dengan mengambil kira keperluan mendesak dan dasar yang ditetapkan oleh KKM. Hasil penilaian tersebut mendapati bahawa MySejahtera merupakan aplikasi yang paling tersedia berbanding aplikasi-aplikasi lain yang ditawarkan. MySejahtera dibangunkan melalui kerjasama strategik antara MKN, KKM, MAMPU, Suruhanjaya Komunikasi dan Multimedia Malaysia (MCMC) dan Kementerian Sains, Teknologi dan Inovasi (MOSTI).

3. MySejahtera merupakan aplikasi yang memfokuskan kepada pengawasan penularan wabak COVID-19 melalui penilaian kesihatan sendiri oleh komuniti. Pada awal pelaksanaan Perintah Kawalan Pergerakan (PKP), pihak KKM amat memerlukan maklumat berhubung tahap kesihatan komuniti memandangkan wabak COVID-19 semakin tersebar dan berpecah kepada kluster-kluster yang lebih kecil. MyTrace pula merupakan aplikasi yang dibangunkan untuk pengesanan kontak menggunakan teknologi *Bluetooth*. Manakala Gerak Malaysia pula



merupakan aplikasi yang memantau pergerakan orang awam semasa pelaksanaan Perintah Kawalan Pergerakan Bersyarat (PKPB).

4. Ketiga-tiga aplikasi ini dibangunkan menggunakan teknologi dan pendekatan yang berbeza. Pembangunan aplikasi yang dilaksanakan secara serentak ini merupakan keperluan Kerajaan untuk menentukan teknologi yang terbaik dan berkesan bagi mengawal penularan wabak ini. MyTrace menggunakan teknologi *bluetooth*, Gerak Malaysia menggunakan teknologi *Global Positioning System* (GPS) manakala MySejahtera menggunakan pendekatan "*community empowerment*" bagi penilaian kesihatan sendiri yang mana data-data yang dikumpulkan disalurkan ke platform *Artificial Intelligence* (AI) bagi pelaksanaan *forecasting* dan *projection*.

5. Berdasarkan pendekatan yang ditetapkan oleh KKM terhadap pengurusan wabak COVID-19, MySejahtera telah diperluaskan daripada fungsi asalnya dan meliputi fungsi imbasan Kod QR yang kini digunakan di seluruh negara. Fungsi ini akan terus diperkembangkan untuk kegunaan jangka masa panjang. Pihak KKM telah menetapkan keperluan supaya MySejahtera terus diperkembang dan digunakan di peringkat nasional dengan mengambil kira keperluan pembentukan satu tadbir urus yang efektif serta peruntukan khusus bagi tujuan menambahbaik dan mengendalikan MySejahtera.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DR. KELVIN YII LEE WUEN  
[ BANDAR KUCHING ]**

**TARIKH : 04 OGOS 2020 (SELASA)**

**SOALAN**

**YB DR. KELVIN YII LEE WUEN [ BANDAR KUCHING ]** minta **PERDANA MENTERI** menyatakan berkenaan pelan Kerajaan dan SPR untuk membolehkan pengundi Sarawak yang tinggal/bekerja di Semenanjung Malaysia mengundi sebagai "*postal voter*" dalam pilihan raya yang akan datang.

**JAWAPAN : YB DATO' TAKIYUDDIN BIN HASSAN, MENTERI DI JABATAN PERDANA MENTERI (PARLIMEN DAN UNDANG-UNDANG)**

**Yang di-Pertua,**

1. Untuk makluman Ahli Yang Berhormat, tempoh hayat Dewan Undangan Negeri (DUN) Sarawak Ke-11 akan berakhir pada 6 Jun 2021 dengan mengambil kira persidangan DUN pertama selepas Pilihan Raya Umum (PRU) DUN Sarawak Ke-10 pada 7 Jun 2016.

2. Berdasarkan maklumat **Daftar Pemilih Tambahan Suku Tahun Pertama Tahun 2020, Sarawak mempunyai 1,246,001 orang pemilih.** Daripada angka tersebut, semakin banyak alamat pemilih mendapati bahawa **seramai 15,056 orang pemilih yang berdaftar di Sarawak mempunyai alamat di luar Sarawak.** Perkara 119 Perlembagaan Persekutuan menetapkan salah satu kelayakan untuk didaftarkan sebagai pemilih ialah bermastautin dalam mana-mana Bahagian Pilihan Raya. Bagi maksud tersebut, SPR menentukan Bahagian Pilihan Raya seseorang pemilih berdasarkan kepada alamat mastautin pemilih seperti di kad pengenalan dan pangkalan data Jabatan Pendaftaran Negara. SPR menggalakkan pengundi untuk memohon pertukaran Bahagian Pilihan Raya berdasarkan tempat mastautin terkini bagi memudahkan urusan pengundian bagi suatu pilihan raya umum atau kecil.

3. Berkaitan pengundi yang tinggal di luar Sarawak sebagai pengundi pos, dimaklumkan bahawa pada masa sekarang, tiada peruntukan undang-undang khusus bagi membolehkan pengundi tersebut untuk menggunakan kemudahan mengundi sebagai pengundi pos. Kemudahan undi pos hanya diberikan kepada kategori-kategori berikut:

a) Ahli SPR dan kakitangan SPR;

b) Petugas pilihan raya;

c) Tentera, Polis, Polis Pasukan Gerak Am (PGA) yang bertugas pada Hari Mengundi Awal;

d) Pengamal media yang bertugas membuat liputan pilihan raya di luar kawasan pada Hari Mengundi;

e) Kakitangan bagi 9 Agensi (Jabatan Bomba dan Penyelamat Malaysia, Jabatan Penjara Malaysia, Agensi Penguatkuasaan Maritim Malaysia, Sukarelawan Simpanan Polis, Jabatan Imigresen Malaysia, Jabatan Kesihatan Malaysia, Jabatan Pendaftaran Negara-UTC, Angkatan Pertahanan Awam Malaysia, Agensi Pengurusan Bencana Negara) yang bertugas pada Hari Mengundi; dan

f) Pengundi Malaysia yang berada di luar negara (kecuali Brunei, Singapura, Kalimantan dan Selatan Thai).

4. Pada masa ini, SPR tidak bercadang untuk menambah kategori yang boleh memberikan kemudahan mengundi kepada pemilih yang berada di luar Bahagian Pilihan Raya pada hari mengundi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI DR. MUJAHID BIN  
YUSOF RAWA [ PARIT BUNTAR ]**

**TARIKH : 4 OGOS 2020 ( SELASA )**

**SOALAN**

Minta **PERDANA MENTERI** menyatakan berapa keuntungan Tabung Haji bagi tahun 2018, 2019 dan unjuran keuntungan bagi tahun 2020. Adakah Kerajaan mempunyai hasrat untuk menubuhkan sebarang Suruhanjaya Diraja (RCI) bagi menyiasat urusan-ususniaga yang telah dijalankan oleh Kerajaan Malaysia.

**JAWAPAN**

**YB SENATOR DATUK DR. HAJI ZULKIFLI MOHAMAD AL-BAKRI,  
MENTERI DI JABATAN PERDANA MENTERI (HAL EHWAL AGAMA)**

Tuan Yang Di-Pertua,

1. Untuk makluman Ahli Yang Berhormat, pengurusan Lembaga Tabung Haji (**TH**) semasa memaklumkan bahawa **TH** telah mencatatkan keuntungan selepas zakat bagi tahun berakhir 31 Disember 2018 berjumlah RM1.6 bilion. Manakala, pada tahun berakhir 31 Disember 2019, **TH** telah mencatatkan keuntungan selepas zakat sebanyak RM1.8 bilion. Walau bagaimanapun, angka-angka ini sedang dimuktamadkan oleh kerana proses audit Laporan Kewangan TH bagi tahun 2019 sedang berjalan, dan kedua-dua laporan kewangan tahun 2018 dan 2019 masih belum dibentangkan di Parlimen sebagaimana tuntutan Akta Badan Berkanun (Akaun dan Laporan Tahunan) 1980 (Akta 240).

2. Untuk makluman Ahli Yang Berhormat, **TH** telah mengumumkan prestasi kewangan setengah tahun pertama bagi tahun 2020 yang telah mencatatkan keuntungan sebanyak RM1.2 bilion. Jumlah keuntungan ini disumbangkan antaranya oleh pendapatan daripada sukuk UJSB seperti yang diumumkan dalam Belanjawan 2020, serta ketiadaan tanggungan subsidi haji bagi tahun ini. Walau bagaimanapun, keterjaminan nilai sukuk ini menjadi pertikaian sesetengah pihak. Jabatan Perdana Menteri (Hal Ehwal Agama) sedang membincangkan jalan terbaik bersama Kementerian Kewangan bagi meneliti perkara tersebut.

3. Pada masa yang sama, wabak Covid-19 berkemungkinan akan memberi kesan negatif kepada kedudukan ekonomi dan pasaran seluruh dunia, termasuk Malaysia, dan akan turut mempengaruhi prestasi pelaburan **TH** untuk tempoh seterusnya, termasuk prestasi kewangan **TH** bagi tahun 2020.

4. Pada masa ini, sekiranya terdapat keperluan, Kerajaan akan menubuhkan Jawatankuasa Petugas Khas yang akan dianggotai oleh mereka yang layak dari segi kepakaran untuk mengkaji sebarang urusniaga yang dijalankan oleh pihak Tabung Haji dengan memastikan ianya menepati kepentingan **TH** sebagai institusi milik umat Islam di negara ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN PANG HOK LIONG [ LABIS ]**

**TARIKH : 4 OGOS 2020 (SELASA)**

**SOALAN**

**YB TUAN PANG HOK LIONG [ LABIS ]** minta **PERDANA MENTERI** menyatakan untuk menghalang wakil rakyat yang dipilih oleh rakyat daripada melompat parti dan untuk memelihara integriti, moral dan kesetiaannya, bilakah Kerajaan akan menggubal undang-undang anti-lompat parti bagi memastikan wakil rakyat yang keluar parti perlu mengosongkan kerusi yang dimenangnya secara automatik.

**JAWAPAN**

**YB DATO' TAKIYUDDIN BIN HASSAN,  
MENTERI DI JABATAN PERDANA MENTERI (PARLIMEN DAN  
UNDANG-UNDANG)**

Tuan Yang di-Pertua,

1. Pada masa ini, Kerajaan berpandangan bahawa setiap warganegara masih dijamin hak untuk bebas berpersatuan yang selaras dengan Perkara 10 (1) (C) Perlembagaan Persekutuan. Hak untuk bebas berpersatuan ini turut telah dibincangkan dalam keputusan Mahkamah Persekutuan dalam kes Dewan Undangan Negeri Kelantan & Anor v Nordin bin Salleh & Anor [1992] 1 CLJ 343.
2. Namun, sekiranya Kerajaan berpandangan terdapat keperluan untuk menggubal undang-undang lompat parti ini pada masa akan datang, sudah pasti kajian terperinci akan dilakukan termasuklah dengan mengadakan perbandingan *best practices* dengan negara-negara lain.
3. Kajian secara terperinci ini perlu dilakukan memandangkan perkara ini bercanggah dengan Perkara 10(1)(C) Perlembagaan Persekutuan iaitu hak membentuk persatuan dengan syarat ia tidak membabitkan soal keselamatan, ketenteraman awam atau prinsip moral. Pihak Kerajaan juga perlu mengadakan konsultasi dengan pelbagai pihak lain termasuklah badan bukan Kerajaan dan parti politik jika ianya hendak digubal kelak.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN KESAVAN A/L SUBRAMANIAM  
[SUNGAI SIPUT ]**

**TARIKH : 04 OGOS 2020 (SELASA)**

**SOALAN**

**YB TUAN KESAVAN A/L SUBRAMANIAM [SUNGAI SIPUT ]** minta **PERDANA MENTERI** menyatakan sama ada Kerajaan bercadang memperkenalkan Rang Undang-Undang Anti Lompat Parti untuk mencegah gejala lompat parti. Sekiranya tidak, apakah pertimbangan Kerajaan dan bagaimana menyelesaikan isu lompat parti.

**JAWAPAN**

**YB DATO' TAKIYUDDIN BIN HASSAN,  
MENTERI DI JABATAN PERDANA MENTERI (PARLIMEN DAN  
UNDANG-UNDANG)**

Tuan Yang di-Pertua,

1. Pada masa ini, Kerajaan berpandangan bahawa setiap warganegara masih dijamin hak untuk bebas berpersatuan yang selaras dengan Perkara 10 (1) (C) Perlembagaan Persekutuan. Hak untuk bebas berpersatuan ini turut telah dibincangkan dalam keputusan Mahkamah Persekutuan dalam kes Dewan Undangan Negeri Kelantan & Anor v Nordin bin Salleh & Anor [1992] 1 CLJ 343.
2. Namun, sekiranya Kerajaan berpandangan terdapat keperluan untuk menggubal undang-undang lompat parti ini pada masa akan datang, sudah pasti kajian terperinci akan dilakukan termasuklah dengan mengadakan perbandingan *best practices* dengan negara-negara lain.
3. Kajian secara terperinci ini perlu dilakukan memandangkan perkara ini bercanggah dengan Perkara 10(1)(C) Perlembagaan Persekutuan iaitu hak membentuk persatuan dengan syarat ia tidak membabitkan soal keselamatan, ketenteraman awam atau prinsip moral. Pihak Kerajaan juga perlu mengadakan konsultasi dengan pelbagai pihak lain termasuklah badan bukan Kerajaan dan parti politik jika ianya hendak digubal kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB PUAN TERESA KOK SUH SIM  
[SEPUTEH]**

**TARIKH : 4 OGOS 2020 (SELASA)**

**SOALAN**

**YB PUAN TERESA KOK SUH SIM [SEPUTEH]** minta **PERDANA MENTERI** menyatakan apakah Pejabat Peguam Negara akan mengadakan garis panduan kepada anggota kehakiman untuk menyelaraskan hukuman terhadap kes-kes jenayah, supaya kes berat tidak dijatuhkan hukuman terlalu ringan manakala kes kecil dijatuhkan hukuman berat dan menjejaskan imej kehakiman Malaysia.

**JAWAPAN**

**YB DATO' TAKIYUDDIN BIN HASSAN,  
MENTERI DI JABATAN PERDANA MENTERI (PARLIMEN DAN  
UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, kuasa kehakiman Persekutuan diperuntukkan di bawah Perkara 121 Perlembagaan Persekutuan. Badan Kehakiman merupakan salah satu cabang kepada pentadbiran Kerajaan Persekutuan yang berperanan sebagai badan yang mentafsirkan undang-undang dan memutuskan apa-apa pertikaian atau perkara yang dibawa ke mahkamah. Berdasarkan perkara ini, jelas bahawa kuasa untuk menjatuhkan hukuman merupakan budi bicara kehakiman (*judicial discretion*) yang diberikan kepada Hakim atau Majistret.

2. Bidang kuasa Mahkamah untuk menjatuhkan hukuman bagi sesuatu kes jenayah adalah sebagaimana yang diperuntukkan di bawah undang-undang, iaitu Akta Mahkamah Kehakiman 1964 [*Akta 91*] dan Akta Mahkamah Rendah 1948 [*Akta 92*]. Disamping itu, Pejabat Ketua Pendaftar Mahkamah Persekutuan juga telah mengeluarkan *Bench Book (Criminal Law) 2nd Edition 2014* yang antara lain mengandungi prinsip penghukuman sebagaimana yang diputuskan oleh mahkamah.

3. Manakala peranan Timbalan Pendakwa Raya, Jabatan Peguam Negara yang menjalankan pendakwaan adalah untuk membantu Mahkamah mencapai keputusan yang mengambil kira kepentingan umum (*public interest*) dan prinsip yang terpakai dalam menjatuhkan hukuman yang sesuai bagi sesuatu kesalahan dengan mengemukakan fakta, keterangan kes dan jenis hukuman yang biasa dijatuhkan bagi sesuatu kesalahan itu bagi kes yang melibatkan fakta yang sama serta peruntukan undang-undang berhubung dengan hukuman bagi suatu kesalahan yang dilakukan, demi keadilan semua pihak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' HAJI MAHFUZ BIN HAJI OMAR  
[ POKOK SENA ]**

**TARIKH : 4 OGOS 2020 | SELASA**

**SOALAN**

Minta **PERDANA MENTERI** menyatakan adakah Kerajaan berhasrat untuk membatalkan proses penstrukturan semula dan pemulihan Tabung Haji (**TH**) yang melibatkan pemindahan aset-aset **TH** yang tidak berdaya saing (non-performing asset) bernilai RM19.9 bilion ke syarikat milik penuh Kementerian Kewangan Urusharta Jamaah Sdn Bhd (UJSB).

**JAWAPAN**

**YB SENATOR DATUK DR. ZULKIFLI MOHAMAD AL-BAKRI  
MENTERI DI JABATAN PERDANA MENTERI (HAL EHWAL AGAMA)**

Tuan Yang Di-Pertua,

Untuk makluman Ahli Yang Berhormat, Pelan Pemulihan dan Penstrukturan Lembaga Tabung Haji (**TH**) telah dimuktamadkan pada 30 Mei 2019 oleh kerajaan yang lalu.

Di bawah Pelan Pemulihan dan Penstrukturan ini, **TH** memperolehi manfaat kewangan hasil daripada penerbitan Sukuk berjumlah RM19.6 bilion. Sukuk ini dan tunai sebanyak RM300 juta dijadikan tukaran kepada aset-aset **TH** yang kurang berdaya saing yang dipindah milik kepada Syarikat Tujuan Khas (SPV) milik Kerajaan, iaitu Urusharta Jamaah Sdn Bhd (UJSB). Sukuk ini disasarkan memberi pulangan tahunan sebanyak

4.05% sehingga 4.1% atau bersamaan hampir RM800 juta setahun kepada **TH**. Langkah ini adalah untuk menutup jurang defisit antara nilai aset dan liabiliti di samping membolehkan pengagihan hibah kepada pendeposit berlandaskan Akta Tabung Haji 1995.

Walaupun bagaimanapun, semasa keputusan berkenaan pelan penstrukturan ini dibuat oleh kerajaan yang lalu, timbul persoalan berkenaan keterjaminan nilai sukuk tersebut. Perkara ini menjadi salah satu teguran utama Jabatan Audit Negara semasa menyediakan Laporan Audit Kewangan bagi Tahun 2018, yang dinyatakan dalam *Emphasis of Matter* Ketua Audit Negara dalam laporan tersebut.

Kerajaan akan memperhalusi semula pelan penstrukturan tersebut dari segenap aspek. Jabatan Perdana Menteri (Hal Ehwal Agama) akan membincangkan jalan terbaik bersama Kementerian Kewangan berkenaan perkara tersebut, termasuk berkenaan keterjaminan sukuk yang dinyatakan. Ini bagi memastikan kepentingan **TH** terpelihara dan pada yang sama tidak membebankan kewangan Kerajaan Persekutuan.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG TACK [ BENTONG ]**

**TARIKH : 4 OGOS 2020 (SELASA)**

**SOALAN**

minta **MENTERI SAINS, TEKNOLOGI DAN INOVASI** menyatakan secara terperinci syarat-syarat yang telah ditetapkan untuk pelanjutan lesen operasi Lynas selama tiga tahun bermula Mac 2020.

**JAWAPAN**

Tuan Yang di-Pertua,

Untuk makluman Ahli Yang Berhormat,

Lembaga Perlesenan Tenaga Atom (AELB) telah meluluskan permohonan syarikat Lynas Malaysia Sdn. Bhd. (Lynas) untuk membaharui lesen berkuatkuasa dari 3 Mac 2020 sehingga 2 Mac 2023 dengan mengenakan syarat-syarat tambahan seperti berikut:-

- (i) Pemegang lesen hendaklah memulakan proses pembangunan Kemudahan Pelupusan Kekal (*Permanent Disposal Facility*, PDF) di lokasi bersesuaian pada tahun pertama dari tarikh kelulusan lesen setelah memenuhi keperluan perundangan yang ditetapkan oleh Kerajaan Negeri dan Persekutuan yang berkenaan. Kegagalan untuk memulakan pembinaan PDF dan mematuhi garis masa (*milestone*) pembinaan pada tempoh masa yang ditetapkan boleh menyebabkan lesen terbatal.

- (ii) Pemegang lesen hendaklah mengemukakan rancangan kemajuan kerja untuk pembinaan PDF dan melaporkan status perkembangannya seperti yang ditetapkan oleh Lembaga. Lembaga berhak menyemak semula keputusan syarat lesen yang telah ditetapkan berdasarkan status kemajuan yang dicapai.
- (iii) Pemegang lesen hendaklah memastikan bahawa PDF yang dibina hanya menempatkan residu *Water Leach Purification* (WLP) yang sedia ada dan sebarang residu WLP yang akan dihasilkan dari Lynas Advanced Material Plant (LAMP) sehingga Julai 2023.
- (iv) Pemegang lesen hendaklah memastikan bahawa loji *Cracking and Leaching* di luar negara beroperasi sebelum Julai 2023. Selepas tempoh tersebut, pemegang lesen tidak lagi dibenarkan untuk mengimport bahan mentah yang mengandungi bahan radioaktif semulajadi *Naturally Occurring Radioactive Material* (NORM) ke Malaysia.
- (v) Pemegang lesen hendaklah melantik pihak ketiga yang bebas (*Independent Third Party*) untuk melaksanakan penilaian berkala ke atas kemajuan pembinaan PDF dan pembinaan loji *Cracking and Leaching* dan mengemukakan laporan penilaian tersebut kepada Lembaga.
- (vi) Pemegang lesen tidak lagi dibenarkan menghasilkan residu WLP di Lynas Advanced Material Plant (LAMP) selepas pemindahan proses *Cracking and Leaching* ke Luar Negara.
- (vii) Pegangan wang cagaran akan dikekalkan bagi keperluan pematuhan syarat-syarat lesen yang berkaitan.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN HANNAH YEOH TSEOW SUAN  
[SEGAMPUT]**

**TARIKH : 04 OGOS 2020 (SELASA)**

**SOALAN**

Minta **PERDANA MENTERI** menyatakan usaha-usaha yang telah dilakukan sejak Mei 2018 untuk memperkasakan Suruhanjaya Pencegahan Rasuah Malaysia, kelemahan perundangan dan infrastruktur sedia ada, bilangan laporan yang diterima berbanding kes yang telah diambil tindakan dan sebab-sebab kes yang gagal disiasat atau diambil tindakan.

**JAWAPAN**

**YB DATO' TAKIYUDDIN BIN HASSAN,  
MENTERI DI JABATAN PERDANA MENTERI (PARLIMEN DAN  
UNDANG-UNDANG)**

Yang di-Pertua,

1. Untuk makluman Yang Berhormat, dalam usaha untuk terus menjamin kebebasan dan kecekapan Suruhanjaya Pencegahan Rasuah Malaysia (SPRM), beberapa inisiatif akan dilaksanakan untuk memperkasakan Suruhanjaya ini selaras dengan tanda aras antarabangsa bagi memastikan inisiatif di peringkat domestik bergerak seiring dengan kehendak global.

2. Dari aspek pengurusan dan profesionalisme organisasi, antara inisiatif-inisiatif yang telah dicadangkan kepada kerajaan untuk dilaksanakan ialah:

- i) Mengadakan peruntukan baharu di bawah Perlembagaan Persekutuan berkenaan Perlantikan Ketua Pesuruhjaya SPRM dan penubuhan Suruhanjaya Perkhidmatan Pencegahan Rasuah (SPPR) dengan bidang kuasa pelantikan, pengesahan jawatan, kenaikan pangkat, pertukaran, kawalan tatatertib dan penamatan perkhidmatan pegawai SPRM;
- ii) Pemerkasaan entiti pemantauan SPRM dengan mekanisme dan terma rujukan yang ditambahbaik dan diberikan bajet berasingan bagi memastikan ia dapat berfungsi secara bebas serta berkecuali daripada SPRM.

3. Manakala beberapa produk-produk anti-rasuah telah dilaksanakan penambahbaikan dan pemantauan dilakukan secara berterusan:

i) CIP v.2.0

Program *Corporate Integrity Pledge* (CIP) melibatkan pelaksanaan inisiatif pencegahan rasuah di organisasi/syarikat melalui pengwujudan polisi-polisi pencegahan rasuah bersesuaian yang disyorkan oleh SPRM untuk sektor swasta.

Program ini adalah untuk membantu organisasi/syarikat untuk mewujudkan dan menguruskan Program Pencegahan Rasuah. Pada tahun 2019 CIP v2.0 diperkenalkan dimana susun aturnya telah ditambah baik serta polisi pencegahan rasuah diperinci bagi membantu dan memudahkan organisasi/syarikat mewujudkan sistem pencegahan rasuah yang lebih sistematik;

ii) CRM v.2.0 Copyright

*Corruption Risk Management* (CRM) merupakan alat pengurusan yang digunakan untuk menangani isu-isu risiko rasuah dengan menghasilkan Pelan Pengurusan Risiko Rasuah (PPRR). Pada tahun 2017, telah diputuskan supaya Bahagian Pemeriksaan dan Perundingan, SPRM mendaftarkan Hakcipta (Copyright) PPRR SPRM melalui MyIPO. Hakcipta berjaya didaftarkan pada tahun 22.02.2019.

4. Dari aspek perundangan, SPRM sedang melaksanakan inisiatif untuk membuat beberapa pindaan seksyen di bawah Akta SPRM 2009 (Akta 694) dan juga mengadakan peruntukan baharu bagi menambahbaik penguatkuasaan dan operasi siasatan Suruhanjaya ini. Antara cadangan pindaan ialah pindaan seksyen 20 ASPRM 2009 – bagi menambahbaik peruntukan berhubung kesalahan rasuah dalam perolehan Kerajaan. Manakala peruntukan baharu lain juga turut dicadangkan bagi mengukuhkan lagi kapasiti kuasa SPRM untuk

menyiasat kesalahan - kesalahan rasuah contohnya kewajipan mengisytiharkan pemilikan benefisiari (*beneficial ownership*).

5. Untuk makluman Yang Berhormat, jumlah maklumat berkaitan rasuah yang diterima oleh SPRM bagi tahun 2018 hingga Jun 2020 adalah sebanyak 19,661. Daripada maklumat ini, hanya 11,050 maklumat yang berunsur rasuah dan selebihnya tidak mengandungi unsur rasuah. Maklumat berunsur rasuah merujuk kepada maklumat yang diputuskan untuk tindakan risikan atau siasatan. Maklumat-maklumat ini akan dibuka Kertas Siasatan (KS), Kertas Penyiasatan Awal (KPA), Kertas Risikan (KR) dan lain-lain tindakan operasi.

6. Maklumat yang bukan berunsur rasuah pula adalah maklumat yang tidak diteruskan tindakan risikan atau siasatan. Antara tindakan bagi maklumat bukan berunsur rasuah adalah pembukaan fail Kertas Pemeriksaan dan Perundingan (KPP) bagi kajian terhadap sistem dan prosedur, rujuk jabatan bagi tindakan dalaman jabatan terbabit, rujuk penulis (pemberi maklumat) untuk tindakan lanjut seperti laporan polis dan lain-lain.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN WONG CHEN [SUBANG]**

**TARIKH : 4 OGOS 2020 (SELASA)**

**SOALAN**

**YB TUAN WONG CHEN [SUBANG]** minta **PERDANA MENTERI** menyatakan adakah Kerajaan akan memberi komitmen untuk meningkatkan peruntukan Parlimen dengan sekurang-kurangnya 20% daripada peruntukan semasa untuk membolehkan kesemua jawatankuasa pilihan khas mempunyai sumber daya yang mencukupi untuk meningkatkan keberkesanannya.

**JAWAPAN**

**YB DATO' TAKIYUDDIN BIN HASSAN,  
MENTERI DI JABATAN PERDANA MENTERI (PARLIMEN DAN  
UNDANG-UNDANG)**

Tuan Yang di-Pertua,

1. Keperluan peruntukan bagi perjalanan kesemua Jawatankuasa Pilihan Khas telah diambil kira dan disediakan dalam peruntukan Parlimen tahun 2020. Keperluan ini juga telah dimasukkan dalam permohonan peruntukan Parlimen tahun 2021. Parlimen Malaysia akan membuat permohonan peruntukan tambahan kepada Kementerian Kewangan bagi urusan Jawatankuasa Pilihan Khas, sekiranya diperlukan.
2. Selain itu, pembentangan Belanjawan 2020 pada 11 Oktober 2019 bahawa Kerajaan memperuntukkan RM5 juta untuk Jawatankuasa Pilihan Khas Parlimen di bawah inisiatif Matlamat Pembangunan Mampan (SDG).
3. Bagi keperluan sumber manusia, Parlimen Malaysia juga telah mengemukakan permohonan kepada Jabatan Perkhidmatan Awam Malaysia pada Februari 2020 untuk mewujudkan jawatan secara pelantikan kontrak bagi menguruskan Jawatankuasa-Jawatankuasa Pilihan Khas Parlimen.

Sekian, terima kasih.

**PEMBERITAHUAN PERTANYAAN DEWAN RAKYAT,  
MESYUARAT KEDUA, PENGGAL KETIGA,  
PARLIMEN KEEMPAT BELAS  
TAHUN 2020**

**PERTANYAAN : LISAN**

**DARIPADA : DATO' HAJI MAHFUZ BIN HAJI OMAR  
[ POKOK SENA ]**

**TARIKH : 4 OGOS 2020 (SELASA)**

**SOALAN**

Minta **MENTERI PERTAHANAN** menyatakan :-

- (a) apakah status penghantaran helikopter MD530G dan apakah status pembayaran kepada pihak kontraktor; dan
- (b) status pembinaan Kapal Littoral Combat Ship dan berapakah kos tambahan yang bakal dibayar Kerajaan berbanding dengan kos asal yang terkandung di dalam kontrak.

**JAWAPAN**

Tuan Yang di-Pertua,

Keputusan Mesyuarat Jemaah Menteri yang bersidang pada 18 Disember 2019 telah memutuskan Kontrak Perolehan Helikopter Mc Donnell Douglas (MD530G) wajar diteruskan, setelah mengambilkira implikasi kewangan yang terlibat. Perolehan ini diteruskan untuk kegunaan Tentera Darat bagi tujuan asal iaitu operasi ketenteraan di Eastern Sabah Security Command (ESSCOM).

Semua enam (6) buah helikopter MD530G belum dapat dibuat penghantaran ke Malaysia kerana tiga (3) buah daripadanya belum siap sepenuhnya, manakala tiga (3) buah lagi perlu melalui proses *Pre Delivery Inspections* (PDI) di premis *Original Equipment Manufacturer* (OEM) MD Helicopter Inc. (MDHI) Amerika Syarikat.

Sehingga Julai 2020 jumlah bayaran kemajuan yang telah dijelaskan kepada Syarikat Halaman Optima Sdn Bhd (HOSB) adalah sebanyak RM112.67 juta dengan tarikh bayaran kemajuan yang terkini pada 14 September 2017. Tiada bayaran kemajuan dibuat kepada HOSB selepas dari tarikh tersebut hingga kini kerana tempoh kuatkuasa kontrak tamat pada 24 November 2017.

Kementerian Pertahanan dalam proses rundingan terma-terma perlanjutan kontrak setelah Kerajaan memutuskan kontrak perolehan ini diteruskan.

Bagi status pembinaan *Littoral Combat Ship* sehingga 31 Julai 2020 pula, adalah sebanyak 56.67% berbanding dengan perancangan asal 85.73%, iaitu kelewatan sebanyak 29.06% atau selama 31.1 bulan. Kerajaan pada masa ini tiada sebarang perancangan untuk mempertimbangkan kos tambahan kepada kos asal kontrak.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK SERI PANGLIMA MADIUS  
TANGAU [TUARAN]**

**TARIKH : 4 OGOS 2020 (SELASA)**

**SOALAN**

**YB DATUK SERI PANGLIMA MADIUS TANGAU [TUARAN]** minta **PERDANA MENTERI** menyatakan adakah cadangan 'electoral reform' yang sudah pun melalui beberapa proses perbincangan akan dilaksanakan sebelum PRU15 dan apakah langkah-langkah yang akan diambil untuk memperkasakan lagi Dewan Negara yang kini dilihat hanya sebagai '*rubber stamp*'.

**JAWAPAN**

**YB DATO' TAKIYUDDIN BIN HASSAN,  
MENTERI DI JABATAN PERDANA MENTERI (PARLIMEN DAN  
UNDANG-UNDANG)**

Tuan Yang di-Pertua,

1. Kerajaan sedang mengkaji cadangan-cadangan reformasi pilihan raya yang turut merangkumi kajian terhadap sistem dan undang-undang pilihan raya di Malaysia. Justeru, Suruhanjaya Pilihan Raya (SPR) sedang bekerjasama dengan Jawatankuasa Pembaikan Sistem dan Undang-Undang Pilihan Raya Malaysia (*Electoral Reform Committee-ERC*), Jabatan Perdana Menteri untuk meneliti perkara-perkara tersebut. Dalam melaksanakan kajian tersebut, tempoh masa yang bersesuaian diperlukan sebelum pertimbangan yang sewajarnya dapat dibuat ke atas setiap cadangan reformasi pilihan raya yang dikemukakan.
2. SPR turut mengalu-alukan penubuhan Jawatankuasa Khas Pilihan Raya yang telah diluluskan oleh Dewan Rakyat pada 17 Oktober 2019 yang berfungsi sebagai mekanisme semak dan imbang terhadap eksekutif negara. Sehubungan itu, SPR akan memberi kerjasama dan komitmen yang sepenuhnya kepada jawatankuasa tersebut untuk memudah cara, menambah baik proses pilihan raya sedia ada dan memberi keyakinan kepada rakyat mengenai sistem demokrasi yang diamalkan di negara ini.
3. Berkaitan memperkasakan Dewan Negara, sesungguhnya sejak penubuhannya, Dewan Negara telah memainkan peranan yang signifikan dalam penggubalan undang-undang negara. Sejajar dengan hasrat penubuhannya, perenggan 64 Laporan Suruhanjaya Reid 1957 menyatakan peranan Dewan Negara sebagai mana berikut:-

*"We do not envisage the Senate as a body of secondary importance. Our recommendations are made with the intention of enabling the Senate to become an influential forum of debate and discussion, and a body which will*

*contribute valuable revision to legislation and which will be able to impose a measure of delay in exceptional cases.”*

4. Maka, sehingga ke hari ini Dewan Negara telah bertindak sebagai mana hasrat dan peranan yang terkandung di dalam Laporan Suruhanjaya Reid 1957 dengan perbahasan yang bermutu serta mampu memberi pengaruh dalam keputusan pihak eksekutif. Antaranya adalah:

- i. Dewan Negara telah meluluskan dengan pindaan DR 8/2004 Rang Undang-undang Racun Makhluk Perosak (Pindaan) 2004; dan
- ii. pada tahun 2018, DR 14/2018 Rang Undang-undang Antiberita Tidak Benar (Pemansuhan) 2018 tidak disetujui dan dikembalikan ke Dewan Rakyat untuk diputuskan semula setahun selepas itu.

5. Jelas di sini bahawa tugas dan peranan Dewan Negara adalah sebagai sebuah badan semak dan imbang kepada keputusan yang dicapai di Dewan Rakyat.

6. Disamping itu, agenda memperkasakan Dewan Negara terus berjalan dengan adanya Kaukus Dewan Negara yang telah diwujudkan melalui Jawatankuasa Pemilih Majlis Mesyuarat Dewan Negara pada 18 Disember 2019 yang lalu. Kaukus ini dipengerusikan oleh YB Senator Tuan Mohd Yusmadi Mohd Yusoff dan mempunyai 12 orang Ahli dalam kalangan Senator dan bersifat *bipartisan*. Antara lain Kaukus Dewan Negara ini berperanan sebagai badan rundingan dan inkuiri terhadap isu-isu semasa dan permasalahan rakyat secara lebih efektif, menerajui dan meneruskan usaha reformasi Dewan Negara, memperkasa peranan Ahli Dewan Negara dalam *parliamentary diplomacy* dan memberi fokus kepada pembangunan kapasiti Ahli Dewan Negara. Terma rujukan Kaukus Dewan Negara ini selari dengan hasrat Kerajaan untuk memperkasa usaha reformasi Parlimen Malaysia bagi menjadikannya sebuah institusi perundangan yang bebas, berwibawa dan bertaraf dunia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DATO' JOHARI BIN ABDUL [SUNGAI PETANI]**

**TARIKH : 4 OGOS 2020**

**SOALAN**

**DATO' JOHARI BIN ABDUL [ SUNGAI PETANI ]** minta **MENTERI LUAR NEGERI** menyatakan Kerajaan telah berbincang dengan Suruhanjaya Pertubuhan Bangsa-Bangsa Bersatu bagi Pelarian (UNHCR) tentang penempatan pelarian Rohingya ke negara lain. Adakah isu Rohingya ini akan menjejaskan hubungan Malaysia dengan Myanmar dan Bangladesh.

**JAWAPAN**

Tuan Yang di-Pertua,

Saya mengucapkan terima kasih kepada **Yang Berhormat [ Sungai Petani ]** atas pertanyaan yang dikemukakan.

2. Untuk makluman Dewan yang mulia ini, rentetan daripada kejadian kemasukan pelarian Rohingya ke Malaysia melalui sindiket pemerdagangan manusia pada tahun ini, Kerajaan Malaysia telah mengambil pendirian tegas untuk tidak membenarkan kemasukan pelarian berkenaan. Ini adalah kerana Malaysia telah pun memberikan perlindungan kepada lebih 200,000 orang pelarian Rohingya yang telah pun berada dalam negara kita. Angka ini merupakan jumlah tumpuan pelarian Rohingya yang terbesar di mana-mana negara di rantau Asia Tenggara. Pendirian ini juga diambil atas pertimbangan bagi mencegah ancaman kluster baharu penyebaran COVID-19 semasa negara kita sedang menguatkuasakan kawalan sempadan negara di bawah beberapa fasa Perintah Kawalan Pergerakan.

3. Dalam usaha Kerajaan menangani jumlah pelarian Rohingya yang ramai, Kerajaan terus mengadakan perbincangan dengan pihak, dengan izin, *United Nations High Commissioner for Refugees* (UNHCR) agar agensi tersebut menyegerakan usaha penempatan semula (*resettlement*) pelarian Rohingya yang memegang kad UNHCR ke negara ketiga. Kerajaan sedar bahawa jumlah yang telah berjaya ditempatkan di negara ketiga adalah amat kecil pada masa ini kerana kurangnya kebersediaan negara-negara ketiga menerima mereka. Oleh yang demikian, saya terus membangkitkan perkara ini dengan rakan-rakan sejawatan saya dan menyeru negara-negara berkemampuan terutamanya negara-negara yang merupakan ahli kepada Konvensyen Pelarian 1951 dan Protokolnya 1967 untuk menerima pelarian Rohingya dari Malaysia.

4. Menjurus kepada persoalan samada isu pelarian Rohingya ini akan menjejaskan hubungan dua hala Malaysia dengan Myanmar dan Bangladesh, saya ingin jelaskan di sini bahawa secara asasnya, Kerajaan Malaysia sentiasa memupuk hubungan diplomatik yang erat dengan

kedua-dua negara. Meskipun terdapat perbezaan pendirian berhubung isu Rohingya, Malaysia tidak mahu hubungan dua hala kita dengan Myanmar terjejas. Kerajaan Malaysia akan terus berbincang dengan Myanmar, baik di peringkat dua hala, mahupun di bawah kerangka ASEAN dalam mencari jalan penyelesaian terhadap masalah pelarian Rohingya.

5. Dalam pada itu, hubungan akrab antara Malaysia dan Bangladesh akan terus dipertingkatkan. Kita sedar dan amat memahami situasi yang dihadapi oleh Bangladesh berkenaan limpahan pelarian Rohingya ke negara itu. Malah, Malaysia merupakan antara negara terawal yang menyampaikan bantuan kepada Bangladesh susulan krisis Rohingya pada tahun 2017. Malaysia juga menubuhkan Hospital Medan Malaysia (HMM) di Cox's Bazar sejak 2017. Hospital Medan Malaysia tersebut bukan sahaja menyampaikan perkhidmatan kesihatan kepada pelarian Rohingya malah penduduk tempatan turut menggunakan kemudahan tersebut.

6. Kerjasama antara Malaysia dan Bangladesh juga dapat dilihat di peringkat antarabangsa. Pada tahun 2019, di bawah usaha sama Pertubuhan Kerjasama Negara-negara Islam (OIC), kedua-dua negara telah membawa isu akauntabiliti ke atas pelanggaran tanggungjawab Myanmar di bawah Konvensyen PBB berkenaan Pencegahan dan Hukuman Jenayah Genosid menghadap Mahkamah Keadilan Antarabangsa (ICJ).

7. Secara kesimpulannya, Kerajaan percaya bahawa jalinan komunikasi dan hubungan dua hala perlu dipelihara agar perbincangan dengan semua pihak dapat diteruskan oleh Malaysia dalam usaha-usaha mencari jalan penyelesaian bagi isu Rohingya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN LIM GUAN ENG [BAGAN]**

**TARIKH : 4 OGOS 2020 (SELASA)**

**SOALAN**

Minta **PERDANA MENTERI** menyatakan status projek Masjid Pagoh dalam Kawasan Parlimen Pagoh selepas suntikan tambahan sebanyak RM3 juta yang diluluskan oleh Kementerian Kewangan pada tahun lepas.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

**Tuan Yang di-Pertua,**

Untuk makluman ahli Yang Berhormat, projek Masjid Pagoh masih dalam peringkat pembinaan. Kemajuan fizikal projek ketika ini adalah sebanyak 96.97 peratus dan projek ini dijangka siap pada bulan September 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA 2020, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN WONG CHEN [ SUBANG ]**

**TARIKH : 4 OGOS 2020 (SELASA)**

**SOALAN**

Minta **PERDANA MENTERI** menyatakan adakah Kerajaan akan meminda Akta Pembangunan Petroleum agar Petronas bertanggungjawab sepenuhnya kepada Parlimen dan untuk mengekang kuasa Perdana Menteri yang berlebihan.



**JAWAPAN**

**YB DATO' SRI MUSTAPA BIN MOHAMED,  
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, Kerajaan sentiasa prihatin atas prinsip tadbir urus yang baik bagi sesuatu agensi Kerajaan, Badan Berkanun atau Syarikat Berkepentingan Kerajaan berpandukan sistem perundangan yang sedia ada.
2. Tuan Yang di-Pertua, PETRONAS merupakan satu entiti yang dikemudi oleh barisan kepimpinan eksekutif kanan yang diketuai oleh Presiden dan Ketua Pegawai Eksekutif Kumpulan. Di samping itu, ahli lembaga pengarah PETRONAS yang diketuai oleh Pengerusi PETRONAS, dilantik dari kalangan pegawai kanan kerajaan serta tokoh korporat yang mempunyai latar belakang dan pengalaman yang luas. Komitmen serta peranan ahli lembaga pengarah adalah untuk memimpin, mengawasi dan memastikan urustadbir PETRONAS sentiasa telus dan berada pada tahap integriti yang tertinggi. Di samping itu, ahli lembaga pengarah PETRONAS juga bertanggungjawab memastikan setiap keputusan yang diambil di peringkat tertinggi adalah selari dengan arah tuju dan keperluan korporat, serta pengendalian perniagaan dan operasi PETRONAS adalah mapan dan mematuhi perundangan sedia ada.
3. Kerajaan Persekutuan sentiasa terbuka untuk meneliti perundangan dan dasar mengikut situasi dan cabaran semasa. Walau bagaimanapun pada masa ini Kerajaan tidak bercadang untuk meminda Akta Pembangunan Petroleum 1974 (PDA1974).

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS  
DEWAN RAKYAT**

---

**PERTANYAAN : LISAN**

**DARIPADA : YB TUAN NOOR AMIN BIN AHMAD [KANGAR]**

**TARIKH : 04 OGOS 2020 (SELASA)**

**SOALAN**

**YB TUAN NOOR AMIN BIN AHMAD [ KANGAR ]** minta **PERDANA MENTERI** menyatakan sama ada pelajar di luar negara tajaan Kerajaan atau syarikat berkaitan Kerajaan akan diminta menyambung pengajian di dalam negara terutama pelajar di negara yang masih terjejas dengan perintah kawalan berkurung atau pergerakan kerana COVID-19 serta mereka yang pernah dikesan positif COVID-19.

**JAWAPAN**

**YB DATO' TAKIYUDDIN BIN HASSAN,  
MENTERI DI JABATAN PERDANA MENTERI (PARLIMEN DAN  
UNDANG-UNDANG)**

Tuan Yang di-Pertua,

1. Jabatan Perkhidmatan Awam (JPA) selaku agensi yang menguruskan penajaan pelajar ke luar negara sangat prihatin terhadap isu berkaitan penularan pandemik wabak COVID-19 di negara-negara yang mempunyai pelajar tajaan JPA. Dalam hal ini, JPA melalui Pejabat Penasihat Pendidikan dan Latihan (PPL) yang beroperasi di lapan (8) buah negara melaksanakan pemantauan rapi kedudukan dan status terkini pelajar.

2. Pada masa kini, pelajar tajaan JPA di luar negara masih lagi meneruskan pengajian sama ada menerusi kelas secara atas talian (online) atau bersemuka. Kaedah pembelajaran ini tertakluk kepada keperluan pengajian dan peraturan yang ditetapkan oleh universiti. Sehubungan itu, pada masa ini, Kerajaan melihat tiada keperluan untuk meminta pelajar luar negara untuk menyambung pengajian di dalam negara berikutan kedudukan pengajian mereka tidak terjejas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN HAJAH FUZIAH SALLEH [KUANTAN]**

**TARIKH : 4 OGOS 2020 (SELASA)**

**SOALAN**

Minta **MENTERI SAINS, TEKNOLOGI DAN INOVASI** menyatakan

- a) kos membina serta proses yang dilalui untuk mewujudkan tapak pelupusan kekal bagi sisa WLP kilang Lynas (PDF) serta garis masa yang ditetapkan oleh pihak Kementerian; dan
- b) pohon diberikan juga koordinat lokasi tapak PDF tersebut

**JAWAPAN**

Tuan Yang di-Pertua,

Untuk makluman Ahli Yang Berhormat,

(a) Kos untuk membina kemudahan pelupusan kekal (PDF) akan ditanggung oleh pihak Lynas dan mengikut kenyataan yang dikeluarkan oleh Lynas pada 30 Januari 2020, anggaran kos pembinaan PDF adalah US\$98 juta atau sekitar RM400 juta.

(b) Kerajaan Negeri Pahang telah meluluskan pewujudan Tapak Pelupusan Sisa Industri Berjadual Pelbagai Kategori seluas 202.35 hektar di Bukit Ketam, Mukim Kuala Kuantan dan pada masa ini Kerajaan Negeri sedang memproses pewartaan secara rasmi kawasan ini sebagai tapak pelupusan industri. Kerajaan Negeri Pahang juga telah meluluskan permohonan Syarikat Lynas Malaysia Sdn Bhd untuk membina tapak

PDFnya di mana-mana kawasan di dalam tapak pelupusan tapak industri Bukit Ketam yang telah diluluskan.

Lembaga Perlesenan Tenaga Atom (AELB) dalam mesyuaratnya pada 28 Julai 2020 telah meluluskan cadangan tapak tersebut tertakluk kepada kelulusan kajian *Radiological Impact Assessment* (RIA), *Environmental Impact Assessment* (EIA) dan lain-lain keperluan pihak berkuasa tempatan yang berkaitan. Laporan semua kajian tersebut perlu dikemukakan kepada pihak berkuasa berkenaan untuk penilaian sebelum kebenaran membina PDF dikeluarkan oleh AELB.

Koordinat cadangan tapak PDF tersebut adalah seperti berikut:

- i. 4°00'46.3"N, 103°14'15.5"E;
- ii. 4°00'46.4"N, 103°14'26.0"E;
- iii. 4°00'35.4"N, 103°14'12.6"E; dan
- iv. 4°00'35.4"N, 103°14'23.0"E.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK LIEW VUI KEONG  
[BATU SAPI]**

**TARIKH : 4 OGOS 2020**

**SOALAN**

Minta **PERDANA MENTERI** menyatakan langkah-langkah yang akan diambil oleh Kerajaan bagi menyelesaikan isu pendatang asing tanpa izin (*undocumented migrants*) di negeri Sabah.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Berkenaan usaha membanteras kebanjiran Pendatang Asing Tanpa Izin (PATI), pihak kerajaan tidak pernah berhenti dalam usaha mengekang kebanjiran PATI di seluruh negara termasuk Sabah. Walaupun dalam tempoh Perintah Kawalan Pergerakan Bersyarat (PKPB) dan Perintah Kawalan Pergerakan Pemulihan (PKPP), agensi yang berkaitan seperti Majlis Keselamatan Negara Negeri Sabah bersama Jabatan Imigresen Negeri Sabah dengan kerjasama Polis DiRaja Malaysia tetap melaksanakan pengusiran tahanan PATI di negeri Sabah.

2. Sehingga hari ini, seramai 6,036 orang PATI dari pelbagai negara telah ditahan di Pusat Tahanan Sementara (PTS) manakala seramai 5,245 orang PATI berjaya diusir walaupun negara asal mereka iaitu Filipina dan Indonesia melaksanakan penutupan sempadan akibat wabak COVID-19, hasil kerjasama dan rundingan dengan negara-negara berkenaan.

3. Kawalan pintu sempadan negara ketika ini telah dipertingkatkan melalui Ops Benteng yang diaktifkan sejak bulan Mei yang lalu di bawah National Task Force (NTF) yang dibentuk hasil kerjasama Angkatan Tentera Malaysia (ATM), Polis DiRaja Malaysia (PDRM), Eastern Sabah Security Command (ESSCOM), Jabatan Imigresen Malaysia (JIM), Agensi Penguatkuasaan Maritim Malaysia (APMM), Jabatan Kastam DiRaja Malaysia (JKDM) dan lain-lain agensi penguatkuasa di bawah NTF. Ops Benteng bertujuan mengekang kemasukan PATI yang juga berisiko membawa ancaman wabak penyakit COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB PUAN HAJAH NATRAH BINTI ISMAIL  
[SEKIJANG]**

**TARIKH : 4 OGOS 2020 (SELASA)**

**SOALAN**

**YB PUAN HAJAH NATRAH BINTI ISMAIL [SEKIJANG]** minta **PERDANA MENTERI** menyatakan jumlah golongan pelarian dan pemohon suaka atau pelarian yang berdaftar dengan UNCHR dalam tahanan imigresen.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Kerajaan melalui Jabatan Imigresen Malaysia (JIM) tidak menahan mana-mana pemohon suaka atau pelarian yang telah berdaftar dan mempunyai dokumen rasmi yang dikeluarkan oleh pihak United Nations High Commissioner for Refugees (UNHCR) Kuala Lumpur. Kerajaan hanya menahan Pendatang Asing Tanpa Izin (PATI) yang tidak mempunyai apa-apa dokumen rasmi yang diiktiraf oleh Kerajaan.

Sekian, terima kasih.



**PEMBERITAHUAN PERTANYAAN LISAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NIK NAZMI BIN NIK AHMAD  
[ SETIAWANGSA ]**

**TARIKH : 4 OGOS 2020 (SELASA)**

**SOALAN**

**TUAN NIK NAZMI NIK AHMAD [SETIAWANGSA]** minta **PERDANA MENTERI** menyatakan tentang gaji kehidupan wajar (living wage):

- (a) apakah data kajian Bank Negara atau agensi Kerajaan lain kadar gaji kehidupan wajar mengikut geografi di Malaysia; dan
- (b) adakah Kerajaan bersedia menimbang bayaran berbentuk elaun bagi memastikan penjawat awam menerima pendapatan setara dengan gaji kehidupan wajar di Lembah Klang.

**JAWAPAN**

**YB DATO' SRI MUSTAPA BIN MOHAMED,  
MENTERI DI JABATAN PERDANA MENTERI (EKONOMI)**

**Tuan Yang di-Pertua,**

1. Untuk makluman Ahli Yang Berhormat, aspek kesejahteraan rakyat sentiasa menjadi agenda utama Kerajaan dalam usaha meningkatkan taraf sosioekonomi dan kualiti hidup setiap rakyat. Terdapat pelbagai kaedah boleh digunakan untuk mengukur taraf sosioekonomi rakyat dalam sesebuah negara. Dalam konteks Malaysia, terdapat pelbagai indikator ekonomi boleh digunakan sebagai kayu ukur kepada pencapaian taraf sosioekonomi. Antara indikator statistik yang boleh digunakan adalah statistik pendapatan isi rumah, ketaksamarataan, kemiskinan, statistik gaji & upah dan lain-lain. Indikator ini merupakan antara proksi yang boleh digunakan untuk mengukur tingkat kesejahteraan isi rumah.
2. DOSM mengeluarkan statistik utama lain terutamanya yang berkaitan dengan pendapatan isi rumah. Statistik ini diperoleh melalui Survei Pendapatan Isi Rumah (HIS) yang dilaksanakan dengan kekerapan dua kali bagi setiap lima tahun.
3. Tujuan utama survei ini adalah untuk mengumpul maklumat pola taburan pendapatan isi rumah dan mengenal pasti golongan isi rumah miskin. HIS merupakan survei secara pensampelan berkebarangkalian yang meliputi negeri, daerah pentadbiran dan strata (bandar luar bandar).
4. Berdasarkan Survei Pendapatan Isirumah 2019, pendapatan isi rumah kasar bulanan penengah meningkat pada kadar 3.9 peratus setahun kepada RM5,873 berbanding RM5,228 (2016). Manakala pendapatan isi rumah purata meningkat pada kadar yang lebih tinggi iaitu 4.2 peratus setahun.
5. Salah satu indikator lain yang juga penting dalam menilai taraf sosioekonomi rakyat adalah melalui Survei Gaji & Upah (SGU). Survei ini

mengumpul maklumat berkaitan gaji dan upah bulanan pekerja bergaji daripada pekerjaan utama. Berdasarkan survei ini, penengah dan purata gaji dan upah bulanan bagi Malaysia pada tahun 2018 masing-masing ialah RM2,308 dan RM3,087.

6. Kerajaan sentiasa dari semasa ke semasa membuat kajian semakan elaun Perkhidmatan Awam secara keseluruhan berdasarkan prinsip-prinsip tertentu. Dalam melaksanakan kajian semakan elaun, pertimbangan dan perhatian secara berhati-hati perlu diberikan mengambil kira kemampuan kewangan Kerajaan kerana pelaksanaannya secara langsung memberi implikasi kepada perbelanjaan mengurus yang tinggi.

7. Selain dibayar gaji berdasarkan jadual gaji yang berkuat kuasa, penjawat awam juga menerima imbuhan tetap dan pelbagai jenis elaun berdasarkan kepada kriteria-kriteria tertentu termasuklah kos sara hidup.

8. Antara elaun yang diberikan berasaskan kriteria kos sara hidup di mana komponen utama kos sara hidup seperti makanan, sewaan dan pengangkutan ialah Bayaran Imbuhan Sara Hidup (BISH) yang dibayar pada kadar RM150 hingga RM350 sebulan mengikut kumpulan perkhidmatan dan kawasan yang telah ditetapkan. Semakan kenaikan kadar terakhir bagi BISH juga telah dilaksanakan Kerajaan pada 1 Januari 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN TONY PUA KIAM WEE  
[ DAMANSARA ]**

**TARIKH : 04 OGOS 2020 (SELASA)**

**SOALAN**

**YB TUAN TONY PUA KIAM WEE [ DAMANSARA ]** minta **PERDANA MENTERI** menyatakan sama ada dalam perjanjian penyelesaian antara 1MDB dan IPIC pada tahun 2017, segala obligasi pembayaran pokok dan faedah pinjaman bon sebanyak US\$3.5 bilion akan ditanggung oleh Kerajaan Malaysia. Adakah tuntutan untuk membatalkan perjanjian tersebut di mahkamah London akan diteruskan.

**JAWAPAN**

**YB DATO' TAKIYUDDIN BIN HASSAN,  
MENTERI DI JABATAN PERDANA MENTERI (PARLIMEN DAN  
UNDANG-UNDANG)**

Tuan Yang di-Pertua,

1. Berdasarkan perjanjian penyelesaian antara 1MDB dengan IPIC pada tahun 2017, segala obligasi berhubung dengan bayaran pokok dan faedah pinjaman terletak kepada tanggungan Kerajaan Malaysia. Pada masa ini, Kerajaan sedang meneruskan tindakan undang-undang untuk membatalkan perjanjian tersebut di Mahkamah di London, United Kingdom. Namun prosiding ini mengambil masa kerana terdapat pelbagai tuntutan balas serta permohonan interlokutori yang difailkan oleh kedua-dua pihak sehingga ke peringkat mahkamah tertinggi.
2. Walau bagaimanapun, Kerajaan bersedia berunding untuk mempertimbangkan apa-apa bentuk penyelesaian sekiranya terdapat tawaran yang menguntungkan Kerajaan apabila diimbangkan antara penyelesaian dengan prosiding litigasi yang berlarutan.

Sekian, terima kasih.